

華嚴經普賢行願品疏

唐麗賓國三藏般若奉詔譯

澄觀述疏

◎ 正宗分（本會）

△第二時諸菩薩下，明其正宗。然初一請分，取起三昧，是發起序。以皆念請，未發言故。念請發起佛三昧故。今例初會現相品中以為正宗。又因請方定，現土集眾，義相關故。四處廣問，皆正宗故。若例法華，三昧現相，猶屬序分。彼非本經之三昧故，故得為序。今以三昧現相為答，須為正宗，不可剋定。大分為二。第一本

會。第二從爾時文殊師利童子從善住樓閣出下，明其末會。本會之中，長科十分。第一大眾念請分。第二如來三昧分。第三淨土現相分。第四遠集新眾分。第五舉失顯德分。第六偈頌讚德分。第七普賢開發分。第八毫光照益分。第九文殊述德分。第十大用無涯分。今初。眾集本為聞佛法故。

○文中分二。初標念請之人。後彰所請之法。

時諸菩薩，及大聲聞，世間諸王，并其眷屬，咸作是念。

今初中，前三類眾，皆與念請。聲聞下說如聾如

盲。此中云何念請佛德。釋有二義。一本跡對說，約本能念，約跡不知。二唯就跡說，同在園林，同仰玄趣，所現超絕，遂如聾盲。故意法師云，理處不隔，故得同疑。未積大心，故不廁其次。

△第二如來境界下，彰所請法，四門分別。第一請問有無。第二請問儀式。第三問人權實。第四正釋本文。今初。通九會中，四會有問。一第一會，標果起因，故須有問。或當會答。二第二會初，尋因至果，故須有問。但因有昇降，六會以答。果無差別，第七會答。故六會

中共斯大問。三第八會中，因果純熟，故須有問。行修無礙，六位頓成，故當會答。四第九會，稱性因果，故須有問，亦當會答。謂但入法界，無差別故。四處都有三百一十句問。謂初及第二，各四十問。第八會中，有二百問。第九，三十。且約現文。中本廣本，非所論也。雖隨問別，三百一十。互相收攝，唯四十問。以並不離因果行位依正體用故。相攝之相，至文當辨。

○第二請問儀式者，此復有二。一言念等殊。二通別有異。今初，請有二種。一言。二念。答亦有二。一者言

答。二示相答。交絡相望，應成九句。今本會中，唯有念請，示相而答。以心傳心，唯證相應，離言道故。下末會中，則通多義。見請善友，多是言請，亦以言答。解脫長者，即是言請，而現相答。纔問法竟，入三昧故。慈行童女，念請言答。觀舍宅竟，一心瞻仰，便為說故。解脫長者，亦是言請，通二種答。從定起已而發言故。餘可思準。二通別者。二八兩會，別問別答。此及初會，通問通答。以是總故，現相答故。亦有別答，至下當知。

○第三疑權實者。有云權疑，菩薩諸王皆位極故，為物生疑，有云實疑，希佛果故，十地菩薩不測佛故。此皆有理。若約聲聞，本即是權，跡乃是實。若此經宗，若權若實，並法界疑，疑為有力，與所說證為緣起故。此事舊爾，海印頓現，念念常疑，念念常斷，無竟期故。

○第四釋文，有六十句，初之十句，及後二十，是所請法。中三十句，但是請儀。三十句中，以義會通，同前三分。取文顯著，多同初會。初會為總，此會為終，無二相故。證入但證初會法故。就文分二。前三十句，念

德難思。後三十句，請隨機演。以初十句，明自體圓著，寄顯果海超絕心言。最後十句，明化用普周，令寄言顯果。由斯二義，文有影略。實三十句皆請顯示。

如來境界，如來智行，如來神通，如來力，如來無畏，如來三昧，如來所住，如來最勝，如來身，如來智。

今初。念德難思中分三。初十句，明所念果法。次十句，明玄妙難思。後十句，明緣會可了。今初十中，前八句，攝初會最初十句，即內行成滿德。末後身智二句，攝次十句，即體相顯著德。初中，以神通句攝加持

句，特勝攝於無能攝取，故具十矣。一境界者，廣則無量。略有二種。一所緣境，謂真俗二諦等。二分齊境，謂佛三業及諸功德，唯屬於佛，非餘有故。前則佛之境，後則佛即境。準瑜伽論，如來境界謂五界差別。一有情界。二世界。三法界。四所調伏界。五調伏加行界。此之五種，唯佛能知，唯佛能具，故為佛境。

二如來智行者。初會名所行，即所行之行。今加智者，智為體故。廣亦無量。故深密經，文殊問佛如來所行及與境界二相何別。如來答云，如來所行謂一切種如來共有不思議無量功德莊嚴淨土，如來境界謂一切種五

界差別。此則境界多明所緣，所行唯屬佛德。要唯有二。一者智行。二者悲行。故出現云，真實行是如來行，謂智行也。無礙行是如來行，謂悲智無礙。譬以金翅觀海取龍，沉於如來遊法性空，觀生死海，悲攝眾生。涅槃經云，復有一行是如來行，所謂大乘大般涅槃。亦通體用，不出悲智。

三如來神通者。所為不測，名之為神。所作無擁，目之為通。如常說六，此經有十。如十通品。下經具有。略有三種。謂一法智通。二神足通。三者幻通。此神通句攝佛加持，謂勝力任持令有所作。廣亦無量。略

有三類。一如加持化身作用，及舍利等。二如加持耆域入火，火不能燒等。三如加持一切非情，作佛事等。下文非一，但是神境一通所攝。

四如來力者。廣亦無量。如下文殊告諸比丘，為欲成就一眾生故，修一切剎極微塵數波羅蜜門，成就圓滿如來一力。如是次第為一切眾生，成就如來一切智力，心無疲厭。不思議品，明於如來有無量力等。略唯有十，即處非處等十種智力，下文廣明。總要唯一實相智力，如智論說。

五如來無畏者，無諸畏懼。離世間品說十無畏。或

說有四，如常所知。

六如來三昧者，此云等持，數過塵算，如下所列師子頻申至不可說剎海塵數三昧門等。

七如來所住者。即初會佛地，佛住地故，謂地德分位。依此經宗，通收萬德。廣則無量。略有十種，如大乘同性經說。然體不出五，謂清淨法界，四智菩提。以斯五法攝大覺性，如佛地論。要唯有二。謂真理妙智，融而無礙，是諸佛地。並有生成住持義故，略云住耳。若云常住大悲，亦是一義。

八如來最勝即舊經自在。謂所作任志無礙成故，即

十自在等。及攝無能攝取。凡所施為無有能攝令不成故。由此今經特名最勝。最勝自在，故能無攝。

後之二句，攝其初會次十句者。彼有六根三業。開其身業，為身光，光明。故有十句。今第九如來身，即攝六根及身口業，以身為總，有總必具別。此會不廣，所以合之。又身通十身，智導根業，所以合也。

十如來智者，即是意業。依唯識論，果位智強，故意名智。若依此經，佛心意識俱不可知，但以智無量故知如來心，故改名智。廣亦無量。略說有十，如出現品有十喻明。攝之成五，謂四智菩提及清淨法界智。諸法

相宗，清淨法界，是所證理，而非是智。金剛頂瑜伽之中說有五智，清淨法界即是本智。要唯有二。謂根本後得。總唯一。謂諸法實相無障礙智。然此十句，既無言答，但現相答，其文非一。若取善友，亦有言答，及示相答。散而不次，不可具配。

一切世間諸天及人，無能通達，無能趣入，無能信解，無能徧知，無能分別，無能思惟，無能觀察，無能揀擇，無能開示，無有能令眾生悟入。

二一切世間下十句，明玄妙難思，凡聖莫測。於中

初二句總明解行不及，謂智慧不能通暢，心行不能證入。次有六句明三慧莫測，不成自利。謂初三句明聞慧莫測。初一妙故，勝解不能印持於境，以信解即是勝解故。二廣故，不能徧知。三深故，不能分別。次一句玄故，思慧不能思惟。次二句明修慧不及。一寂故，不可觀察。二融故，不可揀擇。後二句明四辯莫宣。是故不能成利他德。謂法義不能大開曲示。詞辯不能令他悟入。

唯除諸佛加被之力，佛神通力，佛威德力，佛本願力，及自

宿世善根之力，親近善友力，深淨信解力，廣大志樂力，趣向菩提清淨心力，求一切智廣大行願力。

三唯除下十句，明緣會可了。於中前四，佛力上加。後六，自根堪受。前緣後因，具此可了。前中加被為總。神通威力，此二現緣。本願，宿緣。後六自根堪受中，初一唯宿善。餘五通過現。通為三對。初二內因外緣。次二深信大欲。後二勝願廣行。若有具此，不揀凡聖，必得佛加。十句既圓，難解能解。又此十句，亦可一一如次對前。謂佛加被力則能通達，乃至廣大行願

則令悟入。又此十句，通有二意。一成上顯深，具十方知故。二起後請說，因緣已具故。

唯願世尊以方便力，隨順我等及諸眾生。種種心量，種種信解，種種智慧，種種言辭，種種名字，種種證得，種種地位，種種根清淨，種種意方便，種種心境界，種種依止如來功德。隨能聽受諸所說法。

第二唯願世尊下，請隨機演。於中分二。先十請隨機宜。後二十句請所說法。今初。前云緣會可知，今請以緣隨器。文中三。初總辨感應。次種種心量下，別顯

所隨。文有十一句。於中初三內心器殊。次一外類音異。次一假名差別。上五通凡聖。後六多約菩薩。初二地位優劣，如下海幢及頻申尼為於十地說法各異。二依根除障，謂信等五根三無漏根，故下文云淨菩薩諸根故。三作業差異，隨意所成千門善巧。四隨心緣境理事等殊。五曾依何德希求修習。後隨能聽受諸所說法，總結隨。

顯示如來往昔趣求一切智道，往昔所起菩薩大願，往昔所淨諸波羅蜜，往昔所證諸菩薩地，往昔圓滿諸菩薩行，往昔所

乘智莊嚴道，往昔所行諸清淨道，往昔出離殊勝法海，往昔所起遊戲神通大莊嚴海，往昔所集無量本事相應行海。

二顯示如來下，請所說法。文中分二。先列所請。後結請說。就前中亦二。前十句請說往因。後十句請說今果。今初十句，全同初會第四十句，名次小異。異者當出。十中，初一切智道，道即因也。總明求佛之因，即發趣海。次四全同。二所起大願，即菩提心願，及迴向大願。三波羅蜜，即所行之行，淨除蔽障。四地，即十地。五諸菩薩行，即四菩薩行。瑜伽論中菩薩地說一

切菩薩有四種行。一波羅蜜行。二菩提分法行。三神通行。四成熟有情行。則此句為總。餘三為別。文中具舉。下普賢云，如是無量相應圓滿所行之行，一切劫海說其因緣，劫海可盡，此不可盡。六所乘智莊嚴道者，即是乘海。謂一乘無量乘，運諸菩薩從因至果。雖通萬行，智為上首，一乘體故。故法華大車，以況佛智。又云，佛自住大乘，如其所得法，定慧力莊嚴，以此度眾生。離世間品，說有十種智莊嚴道。七所行諸清淨道者，即助道海。謂積集一切菩提資糧無量助道。三十七品，乃是其一。下諸善友皆廣說之。八出離殊勝法海

者，即出離海。謂永背業惑，證契真理。不斷而離，為勝出離。出離是用，殊勝是體。九遊戲神通大莊嚴海，即神通海。以神通等為莊嚴故。十本事相應行海，即彼智海。宿住智故。亦可智海合在乘中。本事一種，此中別出。以前通請一切菩薩十因海故，不言本事。今請本師往昔所行，特加本事。本事是總。餘九為別。故九句中皆言往昔。下諸善友，多說世尊本因之事。如威德太子，圓滿蓋王等。初會之中，十皆有海。此略無耳。

及徧顯示如來現前成正覺門神通智海，如來自在轉法輪海，

如來神通淨佛剎海，如來調伏一切眾生巧方便海，如來開示一切智城，如來顯示諸眾生成道，如來善入一切眾生生死之處，如來普為一切眾生最上福田，如來普為一切眾生說施功德，如來所記一切眾生種種心行，如來普為一切眾生演說教誡，如來能以三昧神通現眾影像。

第二及徧顯示下十句，請說今果。此之十句，即初會中第三十句，義即多同而文多異。欲顯果用深廣無邊，影略其文。有十二句。義亦唯十，後三合故。一成正覺門，即是佛海故。下文云，等虛空界一切佛剎，如

來出世，顯現無量菩提門法句。言神通智海者，不離一毛端處。於一切毛端處成正覺故，下普賢云，一一毛孔所有剎，佛悉於中坐道場等。二成必演法，即演說海。下云，一毛端處所有佛，一切剎土極微數，悉於菩薩眾會中，皆為宣揚普賢行等。三正必有依，即世界海。下云，一一毛孔中剎海，等一切剎極微數等。言神通者，淨剎有二。一方便淨，修萬行因，得淨土果。二神通淨，謂以神通力，能令法界染淨皆淨。今文是後，義必兼前。四依正既具，必化眾生，須巧方便，即名號海。故彼品云，種種名號，隨眾生根教化調伏。五教化眾

生，須開菩提及涅槃城。舊經梵本，一切智下，皆有法字。法即所證，是涅槃城。城即防非，是解脫海。六示生行業，為至果因，即眾生海。七徧入化處，常處生死，隨物壽限，即壽量海。八欲得依正，須作福田，即安立海，安立法式故。九令成因行，須說功德，即波羅蜜海，檀為行首偏說故。下三句，即三輪化益，是變化海，教化眾生不離此故。十即意業記心輪，十一即語業教誡輪，十二即身業神通輪，並廣難思，十皆稱海。

如是等法，惟垂大悲，普為開演。

第二如是等下，結請為說。上三十問攝初會竟。對第二會辨相攝者，彼五十句，第二十句但是說意，故唯四十。今初十句攝彼四十。後二十句同初會故，已如前說。次請往因第二十句攝彼第二行位十句。一者趣求，即彼十住，初發大心入賢位故。二即十向，迴向大願而為體故。三即十行，行願相扶，故得前卻。四即十地。五即十藏，諸菩薩行是所藏故。六即十願，十種大願為莊嚴故。七即十定，定能去惑為清淨故。八即十忍，忍是出離中最勝故。九即十通。十即十頂，本事相應為超勝故。若以頂即十忍，第八句攝。此句別出，通於前

九，已如上辨。次請示果用第三十句，攝彼第一十句。彼中十句五依五正，而依正間問。一佛剎，二佛住，三佛剎莊嚴，四佛法性，五佛剎清淨，六佛所說法，七佛剎體性，八佛威德，九佛剎成就，十佛大菩提。望於初會及今經文有開合者。此及初會總相該通。彼屬當會，故小異耳。若欲攝者，一即彼大菩提。二即佛所說法。三即彼依報五中前四。四即佛住，常住大悲調眾生故。五即法性，菩提涅槃功德性故。六眾生道，彼中略無，以眾生海但所化故。七亦佛住，住生死故。八為福田，即佛剎成就，安立海故。九亦法性，佛以功德為法性

故。下之三句即彼威德，三輪變化為威德故。上以此問，攝前二分八十問竟。其第八會二百句問，義不異此。文廣不會。

△大文第二爾時世尊下，三昧分。欲酬念請，現相而答。先明三昧為能現故。正與法界體相應故。是果法界佛自證故。唯佛能窮法界源故。果法離言，證相應故。欲顯體用皆自在故。欲令一切同佛證故。

爾時世尊知諸菩薩一切大眾心之所念。

文分為三。初入定緣。二入定因。三正入定。今初。神以知機。領眾念請，故入至定，正顯以心傳心義也。

大悲為身。大悲為門。大悲為首。以大悲法而為方便。充滿虛空。徧周法界。

二大悲為身下，明入定因。以深廣悲而為因故。文中二。先別明四悲。後結其周徧。四悲各有二義。一身二義者。一是入定所依之身，悲所熏故。二身者體義，依義。欲入深定，全依大悲而為體故。二門二義者。一

佛有大智大定等門，數過塵算。今欲利生，唯依悲門令物入故。二者定為所入，悲為能入，佛自入故。三首二義者。一是初義，凡所益物，皆以大悲為先導故。二者勝義，謂非不用餘智定等門，悲增勝故。四方便二義者。一悲定相導，互為方便。今以悲入定，益物之方便故。二者以是智定相即大悲，不滯愛見，故名方便，方能令物普入法界。後充滿下，結其周徧。四皆充徧。界有二義。一廣周故。二無緣故。又周法界彰徧事故。帝網重重皆入處故。

入於師子頻申三昧。

第三入於師子頻申三昧者，正明入定。略為二門。先總，後別。先總者。三昧總稱，此云等持，平等持心趣一境故。然法界之體，非定非亂。法性寂然，強名為定。寂而常照，即名為慧。定慧均者，名為平等。心智契合，名一境性。非合非散，超情絕想，故云三昧。師子頻申，即定別名。以定業用，從喻為名。頻申，晉經名為奮迅。俱是舒展通暢之狀。亦是震動縱任自在無畏之相。就法釋者。即用之體，寂而造極，則差別萬殊，無非法界。即體之用，不為而周，故大小相參，緣起無

盡。是曰頻申自在之義也。第二別釋者。何名師子，為何義故奮迅頻申。依涅槃經師子吼品，明師子王，自知名力，牙爪鋒鋟，乃至晨朝出穴而吼，為十一事，廣有譬合。又離世間品云，菩薩師子王，白淨法為身，四諦為其足，正念以為頸，慈眼智慧首，頂繫解脫繒，勝義空谷中，吼法怖眾魔。然與涅槃，足等小異。今此文中，復以大悲為身首等。明知但取當處義似，未必楷定。今會取諸文。先以十法，合彼師子。後依涅槃，為十一事。今初。一以同體大悲為身，身即體故。二以增上大悲為首，首即上故。三以即智大慈為眼，慈眼視

故。四純以智慧為牙爪，明利穿徹故。五以大悲方便為振尾，四悲居末，方便震動故。六總取四悲為足，依此立故。七法界三昧以為其窟，所入證故。八無緣大悲以為窟門，出入處故。九體用無礙為頻申，皆自在故。十以四無礙廣演證入法界法門以為哮吼，決定宣說一切眾生本與如來同一法界，一證見已一切證故。如此師子，是真師子。約義分異，隨一一門，皆稱法界，具無盡德。如金師子，一切皆金。以金融故，無二無別，舉一全收。第二，為十一事而頻申者。一為摧破一切魔軍及未證法界詐師子故。文云，勇猛精進，摧諸魔眾。二示

眾神力，十智力等無量力故。文云，如來威力不思議故。三淨法界土，佛住處故。即現淨土分。文云，如於此逝多林給狐獨園見佛國土清淨莊嚴，如是十方盡法界虛空界一切世界亦如是見。四為令邪見諸凡夫等知歸處故。文云，無歸趣者為作歸趣。五為安撫生死怖群黨故。文云，了達世間皆如夢等。又云，若有菩薩心堅固，久處生死無疲厭，彼人具足普賢行，得佛功德無能壞。六為覺悟無明眠眾生故。文云，得無癡翳清淨智眼。又云，於一切法離諸暗障。七為行惡法者捨放逸故。文云，發起十種無疲厭心。又云，摧破一切外道邪

論。八令諸菩薩來歸附故。即集新眾分十方菩薩悉皆雲集。九調諸二乘諸大香象令如聾盲捨憍慢故。即舉失顯德分。十教諸菩薩一切子息令頓證故。即通本會大用分中廣說其相。十一莊嚴正見四類眾海，不怖一切邪小徒黨，邪小徒黨皆怖畏故。亦大用分廣說其相。略舉十一，以順彼經。廣收下經，具無量意。又如野干隨逐師子百年，不能作師子吼。大德聲聞，雖處法會，如聾如盲。是師子子隨至三年，能師子吼。圓教菩薩三生頓圓，況不能說。五十七經，有十奮迅十師子吼，恐厭繁文。

△大文第三入三昧已下，淨土現相分。淨土是依，現相通正。酬前念請，示相答故。令其目擊，可現證故。云何目擊。此淨土分，具答上來三十句問。且從相顯。此中答初果體十問。一所現境界法界無邊，答境界問。文云，佛於一念中，普現難思事，菩提深境界，無有能測知。二大悲方便為眾生現，答智行問。文云，大覺威神力，顯現無數行。三現大勝用，是答神通。文云，甚深法王法，無量難思議，所現諸神通，舉世莫能測。四知佛威力令眾現證，答佛力問。文云，佛力不思議，一切

皆能現。五三昧大用師子頻申，答無畏問。文云，勇猛大智幢，堅固無能動。又云，能摧諸外道，種種差別見。六正入三昧及下廣列，答三昧問。文云，三昧妙神通，智慧無邊際。又云，諦觀諸佛力，三昧及神通，億劫共思量，不能知少分。七淨法界土及列四悲，答所住問。文云，已得菩提智，於世起慈悲。八能令大小融攝自在，答最勝問。文云，一切極微剎，神通不可量。九見如來身徧於法界，答佛身問。文云，佛以相嚴身，凝光如滿月，曩劫因修忍，化現於十方。十則見如來智所證入，答智慧問。文云，佛子應善學，甚深諸佛法，證

入諸法中，無著智境界。上所引文，多是偈讚。偈讚正讚三昧相故。餘二十句，集眾中答。集眾亦是三昧力故。是知若能若所，諸境諸心，無非教體。又二聖開顯，菩薩讚德，亦寄言答，以說所現。是故名為現相答耳。就文分三。初結前生後。二嚴此園林。三結通法界。

入三昧已。一切世間普皆嚴淨。

今初。即入三昧已，此是結前。由入定故，方能現相。精義入神，以致用故。寂然不動，無不通故。三昧

即是法之體故。依體起用，不離體故。故牒三昧以為用本。一切世間普皆嚴淨，即生後也。

△第二於時下，嚴此園林。於中有二。先正顯嚴，即器界嚴。後出嚴所因，即智正覺嚴。

於時此大莊嚴樓閣，忽然之間，高廣嚴麗，徧周法界。

今初中有三。一嚴重閣。二嚴園林。三嚴虛空。從略至廣，說有此三，表三緣起。謂閣表自體緣起。林表有為緣起。空表無為緣起。為與無為既無障礙，即是自

體。寄顯差別，三不相離。初中分二。先總。後別。今初。高而無上，廣而無邊，嚴飾華麗，備如下說。徧周法界，語廣分量。表定契心體，不見內外。即事會真，破情顯法。自內而觀，同真性故，廣博無際。自外而觀，不壞相故。閣外有林，林外有空。三重寬狹，莊嚴各異。斯即事理交徹，十方三際無不圓融。林空例然。證無漸次，云忽然也。

金剛為地。眾寶嚴飾。如意寶網，無能勝幢，列布其中。無數寶華，及眾摩尼，普散其上。一切寶聚，處處盈滿。毗

璃寶以為其柱。光明照世摩尼寶王以用莊嚴。閻浮檀金，及諸摩尼，周徧嚴飾。一切眾寶，門闥牕牖，含輝交映，相望間列。階墀軒檻，一切皆以妙寶莊嚴。奇形異像，如諸世主。一切眾生種種相海，摩尼寶網以覆其上。於諸門側悉建幢旛。一一嚴事，各各流光，徧周法界。於樓閣外，階砌欄楯，其數無量，不可稱說。靡不咸以摩尼所成。眾雜妙寶周徧校飾。

二金剛為地下，別明嚴麗，表緣起萬德無不備故。金剛為地，心地堅故。眾寶嚴飾，性功德故。如意寶

網，無心而現，交絡隱映不相礙故。無能勝幢，一切最勝超物表故。列布其中，無不周故。無數寶華，萬行因故。餘之表法，隨宜消息。

爾時復以佛神力故，令逝多林忽然廣博，與不可說佛剎極微塵數諸佛世界其量正等。一切妙寶間錯莊嚴。以不可說寶莊嚴其地，無數摩尼寶以為垣牆，寶多羅樹莊嚴行列。其間復有無量香河，香水盈滿，湍激洄復，一切寶華隨流右轉，演出一切佛法音聲，不思議寶芬陀利華菡萏芬敷，一切妙寶波頭摩華鮮榮布護。不思議數妙寶華樹，高顯榮茂，列植其

岸。不思議數種種雜寶臺榭樓觀，於其岸上次第行列，摩尼寶網之所彌覆。阿僧祇摩尼寶放大光明。阿僧祇眾雜妙寶莊嚴其地。蘊眾香藏，騰出香雲。香氣氤氳，普熏法界。復建無量種種寶幢。所謂無量寶香幢。無量寶衣幢。無量寶旛幢。無量寶繒幢。無量寶華幢。無量寶瓔珞幢。無量寶鬘幢。無量寶鈴幢。無量威德寶網幢。無量摩尼寶王傘蓋幢。無量光明普照摩尼王幢。無量出一切如來名號圓滿音聲摩尼王幢。無量師子遊步摩尼王幢。無量說一切如來本事相應行海摩尼王幢。無量普現法界差別影像摩尼王幢。如是一切諸妙寶幢，周徧十方，處處嚴飾。

第二爾時復以下，明園林嚴。

爾時逝多林上虛空之中，有不思議天寶宮殿諸樓閣雲。復有無數香樹雲，不可說須彌山雲，不可說伎樂雲，出美妙音，歌讚如來。不可說寶蓮華雲，徧覆莊嚴。不可說寶師子座雲，敷以天衣，菩薩坐上歎佛功德。不可說天王形像摩尼寶雲，不可說白真珠雲，不可說赤真珠寶樓閣雲，徧覆莊嚴。不可說一切堅固金剛珠雲，雨莊嚴具。如是一切寶莊嚴雲，皆悉盡於虛空法界徧嚴飾。

第三爾時逝多林上虛空之中下，明虛空嚴，並顯可知。

何以故。如來所種清淨善根不思議故。如來所成白淨法聚不思議故。如來威力祕密加持不思議故。如來神變能以一身普徧一切諸佛世界不思議故。如來能以神力普令十方一切諸佛及佛國土皆入其身不思議故。如來能於一極微塵中普現一切差別世界不思議故。如來能於一一毛端現過去際一切諸佛出興次第不思議故。如來能於一一毛孔放大光明，一一光明悉能顯照一切世界不思議故。如來能於一一毛孔出一切佛剎極微塵數變化雲，充滿一切諸佛剎土不思議故。如來能於一一毛孔普現十方一切世界成住壞劫不思議故。

第二何以故下，出所因。文中分二。先徵。何以世界忽爾廣嚴。後如來下，釋。釋意云，如來之德不思議故。即智正覺嚴。是前為眾示其身力，佛力上加，令眾見故。文有十句。一宿善根力。二無漏智力。三眾福威力及加持力。餘之七句，神通自在力。於中一展，正徧於依。二卷，即依正入正。三橫包，即依中現依。四豎攝，即正中現正。五出光普照。六出用普周。上二皆明正徧依也。七成壞相，即是正中現依。然成處有壞，壞處有成，則是顯深。若一毛中，各見成壞，有多事別，即是顯廣。略舉十句不可思議以顯無盡，云何不能頓淨

法界。

如於此逝多林給孤獨園，見佛國土清淨莊嚴。如是十方盡法界虛空界，一切世界亦如是見。所謂見如來身徧逝多林，菩薩眾會各各圓滿。見普雨一切莊嚴具雲，莊嚴建立。見普雨一切寶威力光明雲，照耀法界。見普雨一切摩尼寶雲，周徧莊嚴。見普雨一切莊嚴蓋雲，覆一切刹。見普雨一切天身變化雲，皆妙嚴飾。見普雨一切華樹雲，其華開敷，猶如海藏。見普雨一切繒綵雲，盤旋宛轉。見普雨一切衣服雲，繽紛而下。見普雨一切華鬘瓔珞雲，相續不絕。見普雨一切燒

香雲，其形旋轉，如眾生身。見普雨一切寶華網雲，周徧莊嚴，相續不斷。見普雨一切末香雲，香氣周流，彌布十方。見普雨一切眾寶幢幡雲，天女執持，周旋空界。見普雨一切寶蓋雲，其蓋周圓，眾寶所成，微妙蓮華，莊嚴其上。流出樂音，聲聞法界。見普雨一切寶師子座雲，如諸眾生所有形像，雜寶鬘網瓔珞莊嚴。

第三如於此逝多林下，結通法界。於中二。先結前標後。後所謂下，顯彼嚴相。言見如來身住逝多林者，見住彼彼十方界林，非是彼界遙見此佛住此園林。是故

文云，菩薩眾會各各圓滿。下諸嚴事，亦是說彼。又是一會徧一切處，亦非彼彼各自有佛，是故名為難思境界。現相分竟。

△大文第四。爾時毗盧遮那下，遠集新眾分。此有三意。

一集彼同證，令此眾會皆仰慕故。二顯三昧力，令諸菩薩來歸附故。三令彼作用，以代如來現相答故。文中分三。一總標因起。二別集十方。三總結稱歎。

爾時毗盧遮那如來住此師子頻申三昧。

今初。由定力集，所以標之。

即時東方過不可說佛剎極微塵數世界海外，有世界海名金沙燈雲幢。佛號毗盧遮那吉祥威德王。於彼如來大眾海中，有菩薩摩訶薩名毗盧遮那燄願藏光明。與不可說佛剎極微塵數諸菩薩俱。受彼佛教，從彼佛土道場眾海，而來向此娑婆世界毗盧遮那佛所。悉以神力出興種種諸供養雲。所謂天華雲。天香雲。天寶蓮華雲。天鬘雲。天寶雲。天瓔珞環釧雲。天寶蓋雲。天妙衣雲。天寶幢幡雲。天一切妙寶莊嚴具雲。皆悉充滿虛空法界。既至佛所，頂禮佛足，以為供養。

修敬畢已，即於東方化作寶莊嚴樓閣，摩尼寶網彌覆其上。於樓閣中，化作光照十方摩尼寶王大蓮華藏師子之座。諸菩薩眾，各於其上結跏趺坐。以大如意摩尼寶網羅覆其身。

二即時東方下，別集十方，即為十段。段各有十。今初。東方分十段者。一來處遠近。集極遠者，表證深故。初會亦遠，初為所信。此為證入，證入於初一合相故。中間諸位淺深不同，義似金剛，亦如成環，初後合故。二有世界下，世界名別，可以義思。三佛號下，本事佛號。四於彼下，主菩薩名。五與不可說下，伴從眷

屬。六悉以下，廣興雲供。皆云天者，自然光淨故。七既至下，詣佛作禮。八修敬畢下，化座本方。本方化者，參而不雜。九諸菩薩下，主屬同坐。十以大如意下，冠網嚴身。準於舊經，冠網第九，同坐第十，則以冠網唯屬於主。今當第十，則主屬俱有。下之九方，十段皆同。有異當釋。其間佛名刹號及所表法，可以虛求。然皆人法依正因果事理，事事無礙法界自在德耳。所有供具皆言雲者，乃有多義。謂能含潤故。能蔭物故。無心現故。無障礙故。視之則有，攬不得故。來無所從，去無至故。取類於雲，非結雲成，以聲雲等不可

見故。又令寶等非真實供，不尊重故。

南方過不可說佛刹極微塵數世界海外，有世界海名金剛海藏。佛號普光徧照吉祥藏王。於彼如來大眾海中，有菩薩摩訶薩名難摧伏速疾精進王。與不可說世界海極微塵數諸菩薩俱。從彼佛會向如來所。悉以神力齎持種種微妙寶鬘，諸供養具交絡莊嚴。所謂持一切妙寶香華鬘。持一切妙寶輪網鬘。持一切寶華瓔珞鬘。持一切金剛寶瓔珞鬘。持一切摩尼寶網鬘。持一切諸寶繒綵鬘。持一切寶形像瓔珞鬘。持一切出現吉祥光摩尼寶瓔珞鬘。持一切毗盧遮那摩尼莊嚴寶網

鬘。持一切師子遊步摩尼寶瓔珞網鬘。悉以神力充滿一切諸世界海。既至佛所，頂禮佛足，以為供養。修敬畢已，即於南方化作毗盧遮那眾寶莊嚴勝妙樓閣，摩尼寶網彌覆其上。於樓閣中，化作普照十方摩尼寶蓮華藏師子之座。諸菩薩眾，各於其上結跏趺坐。以天拘蘇摩妙寶華網羅覆其身。

二南方供具皆云持者，表修持故。皆云鬘者，例餘九方，所求供具，各一事故。舊經五句云帶，五句雜明。梵本十句，皆云繫縛。故總句有交絡莊嚴，是義翻也。則應十句皆言交絡。

西方過不可說佛剎極微塵數世界海外，有世界海名須彌山幢毗盧遮那摩尼寶燈。佛號法界智燈王。於彼如來大眾海中，有菩薩摩訶薩名普徧出生吉祥威德王。與不可說世界海極微塵數諸菩薩俱。從彼佛會向如來所。悉以神力出興種種須彌山雲。所謂不可說佛剎極微塵數種種色幢須彌山雲。不可說佛剎極微塵數種種色塗香燒香末香須彌山雲。不可說佛剎極微塵數種種色金光莊嚴摩尼寶王眾妙資具須彌山雲。不可說佛剎極微塵數種種燄光圓滿莊嚴星宿幢須彌山雲。不可說佛剎極微塵數種種妙色金剛月藏摩尼寶王莊嚴境界須彌山雲。不可說佛剎極微塵數種種光明普照法界閻浮檀金摩尼王幢須

彌山雲。不可說佛剎極微塵數種種法界差別光明普照一切摩
尼王幢須彌山雲。不可說佛剎極微塵數一切如來差別相好摩
尼寶王須彌山雲。不可說佛剎極微塵數一切如來本所修行諸
菩薩行本事因緣相應行海微妙音聲摩尼王幢須彌山雲。不可
說佛剎極微塵數一切如來徧坐道場摩尼寶王須彌山雲。一一
充滿虛空法界。既至佛所，頂禮佛足，以為供養。修敬畢
已，即於西方化作一切香王樓閣。真珠寶網彌覆其上。於樓
閣中，化作種種因陀羅差別光幢摩尼寶王妙蓮華藏師子之
座。諸菩薩眾，各於其上結跏趺坐。冠以如意摩尼寶冠。以
妙色差別摩尼珠網羅覆其身。

三西方皆云須彌山者，梵本但有須彌之言，即是妙高，非要山也。

北方過不可說佛刹極微塵數世界海外，有世界海名寶衣光燄幢。佛號吉祥大光明徧照一切虛空法界。於彼如來大眾海中，有菩薩摩訶薩名無礙吉祥勝藏王。與不可說世界海極微塵數諸菩薩俱。從彼佛會向如來所。悉以神力出興一切妙寶衣雲。周徧莊嚴盡虛空界。所謂黃色光明摩尼寶王衣雲。種種香熏摩尼寶王衣雲。淨妙日幢摩尼寶王衣雲。金燄熾盛吉祥光照摩尼寶王衣雲。雜寶流光摩尼寶王衣雲。一切上妙星

宿形像摩尼寶王衣雲。白玉光燄因陀羅網摩尼寶王衣雲。毗盧遮那殊勝赫弈吉祥光燄摩尼寶王衣雲。光照諸境能令十方一切法界皆出光明互相涉入毗盧遮那摩尼寶王衣雲。大海莊嚴摩尼寶王衣雲。如是等雲，一一充滿虛空法界。既至佛所，頂禮佛足，以為供養。修敬畢已，即於北方化作大海出生摩尼寶王樓閣，及毗瑠璃寶勝蓮華藏師子之座。諸菩薩眾，各於其上結跏趺坐。以星宿幢妙莊嚴藏摩尼寶王為髻明珠。以師子遊步妙威德王摩尼寶網羅覆其身。

四北方皆云衣者，忍辱慚愧嚴法身故。

東北方過不可說佛剎極微塵數世界海外，有世界海名一切大地王。佛號放寶光網徧照法界無相眼。於彼如來大眾海中，有菩薩摩訶薩名妙變化徧法界願月王。與不可說世界海極微塵數諸菩薩俱。從彼佛會向如來所。悉以神力化作種種妙寶嚴飾諸樓閣雲。所謂現一切寶幢樓閣雲。現一切香王樓閣雲。現一切燒香樓閣雲。現一切白栴檀香樓閣雲。現一切拘蘇摩華樓閣雲。現一切摩尼寶王樓閣雲。現一切金剛寶王樓閣雲。現一切閻浮檀金樓閣雲。現一切繒綵衣服樓閣雲。現一切眾妙蓮華樓閣雲。如是等雲，一一彌覆虛空法界。既至佛所，頂禮佛足，以為供養。修敬畢已，即於東北方化作一

切法界門妙寶山峰摩尼寶王樓閣，及無比香王摩尼寶蓮華藏師子之座。諸菩薩眾，各於其上結跏趺坐。冠以種種雜色摩尼寶王妙莊嚴冠。以拘蘇摩華如意寶網羅覆其身。

五東北方云樓閣者，悲智二利相因顯故。

東南方過不可說佛剎極微塵數世界海外，有世界海名香雲莊嚴幢。佛號龍自在王。於彼如來大眾海中，有菩薩摩訶薩名法慧光明威德王。與不可說世界海極微塵數諸菩薩俱。從彼佛會向如來所。悉以神力出興種種上妙寶色圓滿光明雲。所謂金色幢圓滿光明雲。無量寶色圓滿光明雲。如來頂髻色圓

滿光明雲。如來眉間毫相色圓滿光明雲。種種寶色圓滿光明雲。蓮華藏色圓滿光明雲。寶樹垂枝色圓滿光明雲。摩尼寶王色圓滿光明雲。閻浮檀金色圓滿光明雲。日月星宿色圓滿光明雲。如是等雲，一一充滿虛空法界。既至佛所，頂禮佛足，以為供養。修敬畢已，即於東南方化作離垢摩尼拘蘇摩華毗盧遮那吉祥摩尼寶王樓閣，及金剛摩尼寶蓮華藏師子之座。諸菩薩眾，各於其上結跏趺坐。以眾寶光燄摩尼王網羅覆其身。

六東南方云圓滿光者，權實二智無闕行故。

西南方過不可說佛剎極微塵數世界海外，有世界海名曰藏光明摩尼寶王。佛號普智光照法月王。於彼如來大眾海中。有菩薩摩訶薩名摧碎一切魔力智幢王。與不可說世界海極微塵數諸菩薩俱。從彼佛會向如來所。於一一毛孔出等虛空界種種燄雲。所謂拘蘇摩華寶燄雲。種種音樂寶燄雲。一切色寶燄雲。金剛寶燄雲。種種香熏眾寶衣燄雲。如龍電光寶燄雲。毗盧遮那摩尼寶燄雲。騰輝摩尼寶燄雲。吉祥熾盛光藏摩尼寶燄雲。等三世如來普光教海摩尼寶燄雲。如是等雲，一一皆從毛孔中出，徧虛空界。既至佛所，頂禮佛足，以為供養。修敬畢已，即於西南方化作一念普現十方法界種種光

明摩尼寶王樓閣，及香燄燈光摩尼寶王勝蓮華藏師子之座。諸菩薩眾，各於其上結跏趺坐。以離垢藏摩尼寶王妙光明網羅覆其身。

七西南方皆云燄者，以淨智慧燒惑薪故。上之七方，興供表法，通顯神通。下之三段，兼答前問後二十句。

西北方過不可說佛剎極微塵數世界海外，有世界海名毗盧遮那願藏。佛號普光徧照須彌山王。於彼如來大眾海中，有菩薩摩訶薩名毗盧遮那願智星宿幢。與不可說世界海極微塵數

諸菩薩俱。從彼佛會向如來所。於念念中，各於其身，一切相好，一切支分，一切毛孔。一一皆出三世一切諸影像雲。所謂出一切如來影像雲。出一切菩薩影像雲。出一切如來眾會影像雲。出一切如來變化輪影像雲。出一切如來本事海相應身影像雲。出一切聲聞辟支佛影像雲。出一切如來菩提樹種種光色影像雲。出一切如來神通影像雲。出一切世主身影像雲。出一切清淨佛剎影像雲。念念出生如是等雲。一一充滿虛空法界。既至佛所，頂禮佛足，以為供養。修敬畢已，即於西北方化作普照十方毗盧遮那摩尼寶王莊嚴藏樓閣，及光明徧照一切世間摩尼寶王大蓮華藏師子之座。諸菩薩眾，

各於其上結跏趺坐。冠以普燄光明摩尼寶冠。以無能勝光明真珠網羅覆其身。

八西北方十句，皆答前最後為一切眾生現諸影像。若約表者，為顯緣有似非真故。

爾時下方過不可說佛剎極微塵數世界海外，有世界海名一切如來圓滿普燄光。佛號無著智星宿幢王。於彼如來大眾海中，有菩薩摩訶薩名破諸蓋障勇猛智自在王。與不可說世界極微塵數諸菩薩俱。從彼佛會向如來所。悉以神力於其身上——毛孔出演說種種法海妙音聲雲。所謂出演說一切法義

眾生語言陀羅尼海音聲雲。出演說一切三世菩薩修行方便海音聲雲。出演說一切菩薩誓願方便海音聲雲。出演說一切菩薩圓滿清淨波羅蜜海音聲雲。出演說一切菩薩徧一切剎圓滿行海音聲雲。出演說一切菩薩成滿種種神通輪海音聲雲。出演說一切如來往詣道場破魔軍眾銷竭煩惱成等正覺神通輪海音聲雲。出演說一切如來轉妙法輪種種名句脩多羅海音聲雲。出演說一切如來隨應教化調伏眾生方便行海音聲雲。出演說一切如來隨時隨善根隨其願力普令獲得一切智智善巧方便海音聲雲。如是等雲，一一充滿虛空法界。既至佛所，頂禮佛足，以為供養。修敬畢已，即於下方化作現一切如來宮

殿光明種種色藏寶樓閣，及一切妙形像寶蓮華藏師子之座。諸菩薩眾，各於其上結跏趺坐。以普現一切菩提場影像光幢摩尼王冠以嚴其身。

九下方毛孔中十句供雲，答十二問。初之六句，答因中八問。餘二，上方答之。謂一答智莊嚴道，一切法義是智嚴故。二答趣求一切智道，修行即是趣求義故。三答大願。四答諸地，一地一度故。及答出離，言清淨故。五答諸菩薩行及答助道，助道即行故。六答神通。餘之四句，答果用四問，謂七答正覺問。八答轉法問。

九答調伏眾生。十答開示一切智法城。

上方過不可說佛剎極微塵數世界海外，有世界海名無盡佛種性。佛號普智圓滿差別光明大聲王。於彼如來大眾海中，有菩薩摩訶薩名普徧法界大願際。與不可說世界海極微塵數諸菩薩俱。受彼佛教，發彼道場，而來向此娑婆世界毗盧遮那如來所。悉以神力，各於其身，一切相好，一切身分，一切支節，一切毛孔，一切言音，一切名句，一切衣服，一切莊嚴具中，現毗盧遮那等，盡過去際一切諸佛，盡未來際一切諸佛，盡現在際一切諸佛，并其眾會十方剎土，清淨雜染廣

狹大小，靡不皆現。亦現彼佛過去所行檀那波羅蜜，隨順積集一切施行受者財物，本事影像相應行海。亦現彼佛過去所行尸羅波羅蜜，隨順積集本事影像相應行海。亦現彼佛過去所行羸提波羅蜜，斷截支體，心無動亂，隨順積集本事影像相應行海。亦現彼佛過去所行毗梨耶波羅蜜，勇猛不退。隨順積集本事影像相應行海。亦現彼佛過去所求一切如來禪那波羅蜜，隨順積集而得成就，本事影像相應行海。亦現彼佛過去所求般若波羅蜜，一切如來所轉法輪所成就法，發勇猛心一切皆捨，本事影像相應行海。亦現彼佛過去所成方便波羅蜜，樂見一切佛，樂行一切菩薩道，樂化一切眾生界，本

事影像相應行海。亦現彼佛過去所發願波羅蜜，一切菩薩廣大誓願，清淨莊嚴，本事影像相應行海。亦現彼佛過去所成一切菩薩力波羅蜜，了種種行清淨和合，本事影像相應行海。亦現彼佛過去所修一切菩薩智波羅蜜，圓滿清淨，種種差別，證悟法門，本事影像相應行海。如是所現一切如來本事影像相應行海，悉皆徧滿廣大法界。既至佛所，頂禮佛足，以為供養。修敬畢已，即於上方化作一切金剛寶王種種莊嚴藏樓閣，及帝青金剛寶王蓮華藏師子之座。諸菩薩眾，各於其上結跏趺坐。以演說三世如來名號大音聲海摩尼寶王為髻明珠莊嚴寶冠。以一切妙寶光燄熾盛摩尼王網羅覆其

身。

十上方中十句供內，通答因中二問。謂本事因緣，及波羅蜜。果中十句。下方供中答其四問。西北方答影像一句。淨佛剎句，淨土合答。示眾生道，但是所化。入生死處，但是化處。並通攝在所見境中。十問已竟。餘之五句，在此方中。於檀度中，答其福田，及說布施功德二問。其三輪化益三句，亦通在諸句之中。其所答問或不次者。十方齊來，諸供齊現，隨方取之，故不次耳。以門往收，無不次也。又皆言本事者，表三世法體常住故。由得體用非一異智，以用隨體無不存故。德相

業用皆自在故。若理事別修，則不得爾。不同餘說，現在之法體用俱有，過未之法體用皆無。況於小乘三世皆有。以彼所立過未有體而無用故。

如是十方一切菩薩，各以種種神通，興種種供養雲，來會道場，普周法界。

第三如是十方下，總結稱歎。於中三。初總明雲集。二總歎勝德。三總結集因。今初。雖會道場，而周法界。

此諸菩薩并其眷屬，皆從普賢行願所生。

二此諸下，總歎勝德。於中二，初總顯所生。

以淨智眼，普見三世一切諸佛眾所樂見種種相海。得無礙耳，普聞十方一切如來所轉法輪脩多羅海。已得至於一切菩薩最勝自在究竟彼岸。於念念中現大神變，能徧親近十方諸佛。一身充滿一切世界，普現諸佛道場眾會。

後以淨智眼下，別明勝德。於中有五。一上近諸佛德。二下化眾生德。三智慧深廣德。四說法無礙德。五

大用自在德。今初。五句分四。一十眼圓明，十身皆見，故云一切種種相海。謂三十二相八萬四千十蓮華藏微塵數相皆悉得見。二得無礙下，十耳圓聽一切法門。前三世豎窮，此十方橫徧。一切之言，通橫豎也。三已得下，具十自在，盡其邊涯。四於念念下二句，得十神通，徧近諸佛。於中上句現大神變，容有多身。下句但云一身，則不分而徧。又上句但言近佛。下句意與眾俱。

光明徧照一切世界。於一塵中，普現十方盡虛空界一切世

界。於彼世界現種種身。隨諸眾生應受化者，調伏成熟，未曾失時。一切毛孔出大音聲，周聞十方。演暢如來妙法輪雲廣大境界。

第二光明徧照下，下化眾生德。於中五句。一光網徧攝。二於一塵下，塵現多剎。三於彼世下，剎現多身。四隨諸下，隨機調伏。未熟而化，熟而不化，皆曰失時。今感而遂通，故無失矣。上三句依中現依正。五一切毛孔下，毛孔演法，是化生教門。即正中現正。廣大境界，即所演也。如來深境界，其量等虛空，故云廣

大。

知諸眾生悉皆如幻。知諸如來悉皆如影。知諸界趣業行受生悉皆如夢。知諸世間所現果報如鏡中像。知諸世間諸有生起如熱時燄。知諸國土依心想住皆如變化。通達如來十種智力。

第三知諸眾生下，智慧深廣德。文有七句。六句喻明。末句結歸十力。一眾生緣成，故云如幻。論云，真性有為空，如幻緣生故。如幻不實，故空。如幻不無，故有。此二不二，即是中道。若約空門，了幻無幻，方

為見幻。若約有門，幻法不無，方名為幻。故幻住自性不可思議。二諸佛隨機，故云如影。真佛如光，無形質故，如虛空故。物機如質，能映光故，能感佛故。見佛如影，隨質端邪長短異故，隨心勝劣報化殊故。三三界六趣因業受生，猶如夢境因思所起。四隨質妍媸，像有好醜，隨因善惡，勝劣報生。前句約四生等殊，此約苦樂等報。又前是引業，此是滿業，故不重也。五世間生起，皆想所持。熱燄非水，渴生水想。世間無生，妄起生想。諸有通於二十五有。生起直論所起果報，不同前夢因業受生。若依攝論，燄遣執有心心法轉。今明了達

依他非實，妄起想心。六國是依報，亦心想生。心變影像，故依想住。心淨土淨，心染土染。今無而忽有，有已還無，故如變化。幻喻為總。餘五為別。同異成壞，準思可知。下當廣說。後通達下一句，結歸十力，十種智力攝諸智故。六喻所喻，即十力智所知之法。

威德自在，如大牛王。得無所畏，能師子吼。深入無盡辯才大海。了知眾生諸祕密海。深入文字語言智海。了達法界猶如虛空。

第四威德自在下，說法無礙德。文中二。初說法之

身，威德蔽眾故。五十七云，牛王奮迅，映蔽一切天龍夜叉乾闥婆等諸大眾故。二得無所畏下，說法之德。初句具四無畏，能決定說。次深入下，具四辯才故，說稱物心。初句辯無礙。了知下，義無礙。深入下，詞無礙。了達下，法無礙。舊經倒為其次。今經不次。

得諸菩薩神通智慧。威力勇健，摧伏魔軍。智力明徹，了達三世。知一切法無有違諍，而常趣求一切智地。以無斷智入諸世間。以法界智流出教海。得神通力，能令十方一切世界展轉相入。得善根力，於諸世界自在受生。得周徧眼，普見

十方一切世界廣狹大小。得無礙智，於微細境現廣大剎，於廣大境現微細剎。以自在力，於一佛所，得一切佛功德智慧威神所加。普見十方，無有疑惑。於一念頃，能以神通普遍十方一切剎海。

第五得諸菩薩神通下，大用自在德。於中有二。初句總明所得。後威力下，別明通用。於中八力。一威德力摧邪。二智力下，智慧力窮法。即法智通，皆權實雙行。初了三世者，智了其有，慧了其空。次知一切下，空故無諍，而不壞相故求智地。次以無斷下，不斷煩惱

故入世間。而證法界故流教海。三得神通下，神通力融攝。四得善根下，善根力受生。五得周徧下，普眼力無礙。六以自在下，自在力上加。七普見下，普智力決斷。八於一念下，無念力疾周。上五門別歎，初句為總，同異成壞準思可解。歎勝德竟。

具足如是無量功德諸大菩薩滿逝多林，皆是如來威神之力。

第三具足如是下，總結集因。結其在會因由佛力。集眾分竟。

△大文第五，於時上首諸大聲聞下，舉失顯德分。亦名舉劣顯勝，謂舉二乘之不知為失為劣，顯菩薩之不共勝德難量。何者，且五百弟子聲德俱高。身廁祇園，目睹嘉會。而於大用不見不知。比夫日月麗天，盲者莫睹。雷霆震地，聾者不聞。是知理契則鄰，菩薩遠而不隔。心迷便阻，聲聞對如聾盲。問，無行經說，喜根強說，勝意謗生。此則凡愚許聞玄旨。法華將啟，威遣五千。此不令聞，恐其生謗。如何今教異彼二經。答，諸佛化儀，事非一準。喜根知謗，能為遠因。如罵良藥，服亦病愈。如聞毒鼓，死定無疑。不謗不聞，無由取化。如

賢護等曾謗不輕，於千劫中墮阿毗獄。其罪畢已，還遇不輕，受其教化。五千上慢，留即謗生。故且遣之，令後成益。或佛在受化。或滅後聞經。其不在會，轉為宣說。聞父背喪，服藥病除。此經五百，已居極果。聞不生謗，遣無成益。故留在座，令其不聞。方顯一乘不共凡小。又法華意，漸教終極，敗種將生。威力遣之，篤勵在會。知住為貞實，去是繁柯。聞法疑除，自知作佛。復獎今後，知法難聞。此經意顯頓教之初，欲彰深勝。留使不測，示闕因緣。篤諸後學，令聞慶悟。勉乎凡流，修見聞種。或人天受道。或八難超昇。皆是如來

方便大用。或海印炳現。或大權應為。以顯法深。各有由矣。文中三。初舉迷失之人。二顯所迷之境。三釋迷失之由。

於時上首諸大聲聞。大智舍利弗。神通目犍連。摩訶迦葉。離婆多。須菩提。阿菟樓駄。難陀。劫賓那。迦旃延。富樓那。彌多羅尼子等。

今初。十人之中，三非大弟子。意該五百，故標云諸。舍利，此云鷲鷲。其母目睛明利，似彼鳥故。弗者子也。從母立稱，故有子言。目犍連，此云採菽氏。上

古仙人，山居豆食。尊者母是彼種。從外氏立名。有大神通。揀餘此姓，故復云大。摩訶迦葉，此云大飲光。本族仙人，身有光明，飲蔽餘光。又尊者身，亦有金光，飲蔽日月。頭陀第一。揀餘迦葉，故云大也。離婆多，此云室星。祀之而生。或云假和合。見有二鬼爭食死人，裂彼手足，悟身無我，云假和合。如智論說。須菩提，此云善現。生而室空，現善相故。亦曰空生，表解空故。阿菟樓駄，此云無滅。亦云無沒。一食之施。九十一返天上人間，不沒惡趣故。難陀，此云歡喜。性極聰敏，音聲絕倫故。劫賓那，此云黃頭。以是黃頭仙

人族故。迦旃延，此云翦剃種。富樓那，此云滿願。彌多羅，此云慈也。尼者女也。彌多羅尼，即其母稱。母甚慈故。亦由懷之增慈心故。具云滿慈子。廣辨古今譯殊，如音義等。德行緣起，廣如智論阿含等說。

在逝多林。皆悉不見如來神力，如來嚴好，如來境界，如來遊戲，如來神變，如來尊勝，如來妙行，如來威德，如來加持，如來剎海。

第二在逝多林下，舉所迷之境。然初明不見，下文亦說不聞不思。心意既迷，六根皆昧。於中三。初明迷

果。次辨迷因。後總結迷失。今初十句。初總。餘別。十句多同念請果中初之十句。謂先念勝境，佛為現之。對而不知，豈非迷失。神變多約大小等境，互為自在。遊戲即明不壞本相。餘可準知。

亦復不見不可思議菩薩境界，菩薩集會，菩薩徧入，菩薩親近，菩薩神通，菩薩遊戲，菩薩眷屬，菩薩方處，菩薩師子座，菩薩宮殿，菩薩威儀，菩薩三昧，菩薩周鉢觀察，菩薩師子頻申，菩薩勇猛，菩薩供養，菩薩受記，菩薩成熟，菩薩業身清淨，菩薩智身圓滿，菩薩願身顯示，菩薩色身普

徧，菩薩相好具足，菩薩常光圓滿，菩薩放大光網，菩薩起變化雲，菩薩普徧方網，菩薩諸行圓滿。

次亦復不見下，明其迷因。因即菩薩。初句為總。正是分齊，兼所知境。次菩薩集會下，別顯。言集會者，正取新集菩薩。徧入者，謂身徧剎塵，智入諸法等。親近一句，舊經有二，謂普至普詣。明十方菩薩普來至此，法界無邊盡皆詣彼，皆為近佛，故云親近。此中諸句，正說上來菩薩作用，約事可知。準離世間品，兼表法門，一一皆十。如十徧入，十觀察等。

如是種種皆悉不見。

三如是種種下，總結迷失。可知。

△第三何以故下，釋迷所由，先徵。後釋。

何以故。

徵意云，親居法會，何不見聞。

△釋意云，彼境殊勝，宿因現緣並皆闕故。然皆廢本就跡，以明欲顯一乘因果不共。文分二別。先法。後喻。前中亦二。先闕宿因。後闕現緣。

以善根不同故。

前中有五。第一總標善差。第二舉劣異勝。第三舉勝簡劣。第四結不見聞。第五徵釋結成。今初。昔唯小善，曾無大因。蒲柳之芽，安有松桂之質。

彼於過去本不修習見一切佛種種神通妙善根故。本不讚說十方剎海普徧莊嚴淨功德故。本不稱歎諸佛世尊種種神通變化事故。

第二彼於過去本不修習下，舉劣異勝。釋因不同，

明無大善。有十九句分二。前十二句釋不見佛果之因，後七句釋不見菩薩之因。前中亦二。前三不讚果故。

本不能於生死之中發阿耨多羅三藐三菩提心故，本不勸發一切眾生令住廣大菩提心故。本不能令如來種性不斷絕故，本不精勤攝受一切諸眾生故。本不勤修一切菩薩波羅蜜故。本於生死不勸眾生求智眼故，本不修習順一切智諸善根故，本不覺了如來出世勝善根故，本不獲得普徧嚴淨一切佛剎神通智故。

後本不能於生死之中下九句，不修勝因故。於中

三。初二句總明闕大心故。次本不能令下二句，別明闕大悲故。後本不勤修下五句，別明闕大智故。

本不獲得菩薩所知廣大境界清淨眼故，本不欣求超出世間究竟不共大善根故，本不發起一切菩薩廣大誓願出離智故，本不從於一切如來威力加持之所生故，本不能知一切諸法皆如幻故，本不能知菩薩所知思想執持皆如夢故，本不能得菩薩勇猛廣大志樂深歡喜故。

第二本不獲得下，釋不見菩薩所因中七句。一闕十眼故。二闕性相無礙不共善故。餘五可知。由本不修，

不聞不見。願諸後學修見聞種。

如是種種皆是普賢智眼境界。不與一切二乘所共。

第三如是種種皆是普賢下，舉勝簡劣。言如是者，指前所不見聞。普賢境者，即是舉勝。不共二乘，此名揀劣。

以是因緣。彼諸上首大德聲聞，不能聞，不能信，不能知，不能見，不能憶念，不能觀察，不能籌量，不能思惟，不能證入，不能分別。

第四以是因緣下，結不見聞。以前闕因境勝因緣故不見聞，謂耳不聞，心不信，智不知，眼不見，聞慧不能憶念，修慧不能觀察，思慧不能籌量思惟，證智不能證人。

何以故。諸佛菩薩神通境界非諸二乘狹劣境故。是故雖在逝多林中，不見如來廣大神變。

第五何以故下，徵釋結成。可知。

復次彼諸聲聞，無如是菩薩所修最勝善根故，無如是見佛神

通清淨智眼故，無如是甚深三昧微細觀察故，無如是廣大神力所加持故，無如是不可思議解脫門故。無如是神通自在故，無如是廣大勢力故，無如是廣大威德故，無如是最勝住處故，無如是智眼所行境故。是故於此不能知，不能見，不能入，不能得，不能徧解，不能出生，不能觀察，不能忍受，不能修行，不能安住，不能開示。亦復不能廣為人說，不能讚歎，不能指示，不能授與，不能攝取，不能勸進，不能教誨，令其修習，令其安住，令其證入諸佛境界。

第二復次彼諸聲聞無如是下，明闕現緣。於中三。

第一舉劣異勝。第二舉勝揀劣。第三結不見聞。初中二。初明闕勝德行故。後明安住自乘故。前中二。先正明闕勝德行。文有十句，即前不見聞境。後是故下十句，結不見聞。可知。

何以故。彼諸聲聞無有如是大智慧故。依聲聞乘而出離故。入聲聞道得智慧故，修聲聞行求滿足故，住聲聞果為究竟故，悟解聲聞實諦智故，住於差別真實際故，樂住寂靜為涅槃故，於諸世間捨大悲故，遠離救護諸眾生故，恆住自事趣寂滅故。是故雖在逝多林中，不見如是種種神變。何以故。

本於如來一切智性，不能志求，不能積集，不能樂欲，不能出生，不能修習。不能清淨。亦於如來三昧神通，不能入，不能行，不能知見，不能證得。

第二何以故下，明安住自乘故。於中二。先正明住自乘故。二重徵釋成。初中三。初徵。次釋。後結。今初。徵云，何以闕勝德行。次釋云，由無智慧，安住自乘不進修故。此文正同法華四大聲聞云，世尊令我等出於三界，得涅槃證。但彼自釋聞而不樂。此釋樂而不聞。小有異耳。有十一句分二。初句無智，是住所以。

餘十句正明住自乘。初總。餘別。別中，一道者，乘通因果，道多約因。望下八句，猶名為總。道略有四。一加行道，四善根等亦有異故。二者見道。三即修道。四無學道。第二句即修道，重慮諦理，通漏無漏，唯斷貪等，不能數習無分別智，離能所取二障麤重妙用難思故。三即無學道，唯得盡智及無生智斷三界惑以為究竟，不得如來無漏蘊界斷二障習。四五二句別明見道。四能住智，謂觀上下諦八忍八智，不能觀如及觀正智，唯斷煩惱不斷所知故。五即所住生空法有為差別實際。此上二句，亦通餘道。次有四句闕無住道。六由住涅

槃，不能不住涅槃。七八由闕悲不化，不能不住涅槃。九自事有二。一約自利事，亦不能不住涅槃。二生空自事，則不能不住生死。以見生死是有是亂，別趣寂故。又十句中，初一住教。次二住行。次一住果。次二住理。後三闕利他行，住於自行。則教理行果並異菩薩。後一句，結不見聞。二何以故本於如來下，重徵釋成。徵云，何以住自乘。釋云，本在因中不習大故。然因不由緣故前闕因，不以緣釋。緣必由因，故今闕緣，以無因釋。

何以故，如是境界唯諸菩薩廣大智眼乃能見知，非諸聲聞所行境故。

第二何以故如是境界下，舉勝揀劣。徵云，何以不見。釋云，境勝器劣故。

以是因緣。諸大聲聞雖復住在逝多林中，不見如來種種神變，種種加持，種種佛剎，種種嚴淨。及大菩薩普徧眾會遊戲神通，皆悉不見。

第三以是因緣下，結不見聞。可知。

△第二譬如恆河下，喻說。文有十喻，以顯無盡。一鬼對恆河喻。二覺夢相對喻。三愚對雪山喻。四伏藏難知喻。五盲不見寶喻。六淨眼無障喻。七徧處定境喻。八妙藥翳形喻。九二天隨人喻。十滅定不行喻。此之十喻。自古諸德皆將配前所迷佛果十句，唯二天喻喻上第二如來嚴好，餘皆如次。今解有二。一總相則通。二隨勝則別。然皆通喻因果。不喻迷因，義不盡故。合文中，亦言不見菩薩眾故。而言通者，一一喻中皆通喻前迷諸勝德，以合多言不見如來諸神變故。二別喻者，欲顯差別，從勝說故。若不別者，何俟多喻。但通因果及

能所迷，有異昔解。十中前九勝境為喻，以恆河等喻佛菩薩勝功德故而具十德。後一約就劣法為喻，滅定不行喻二乘故。就前九中，配其所迷佛菩薩德，及能迷中所闕因緣，並皆如次。文中第一第五第十，單喻聲聞不見聞等。二三四七，雙喻菩薩及與聲聞見不見別。六八九三，佛對聲聞論見不見。有三類者，文影略耳。實則諸喻通於迷悟。其能迷中亦有通別。通則皆喻闕諸因緣。別則隨勝一一各配。前九喻闕德行。後一喻住自乘。十喻各二。先喻。後合。

譬如恆河，於其兩岸，多有百千萬億無量餓鬼。裸露飢渴，羸瘦憔悴。皮肉筋骨，內外焦然。風飄日曝，徧體乾枯。烏鷲豺狼，諸惡禽獸，競來搏撮。為渴所逼，欲求水飲。雖住河側，而不見河。設有見者，見其枯涸。或見流火。或見燒煨。何以故。深厚業障之所覆故。諸大聲聞亦復如是。雖復住在逝多林中。不見如來廣大神變。何以故。不樂種智，無明翳膜蔽其眼故。不曾種植一切智地勝善根故。

今初，鬼對恆河喻。其恆河清流，通喻佛及菩薩潤益甚深德，別喻如來神力菩薩境界。以皆二段初總句

故。其不見河，喻於二乘闕宿因中初之三句，闕現緣中無最勝善。文中二。先喻。後合。喻中二。先明有失不見。後徵釋所以。今初。生分已盡，故稱為鬼。無生忍衣未得，名裸。法界行食不得，名飢。真解脫味未得，為渴。飢渴故餓。此上諸句並無真道，即是業餘。行苦所逼為體焦，即是苦餘。空見烏鷲。有見豺狼。於有無諦作決定解，名為搏撮。諸惡禽獸，此言太寬。煩惱斷故。二經所無。若作所知，亦有理在。內含大機，有真脫分，名渴求水。身居法會，名住河側。不睹神變，名不見河。設睹神變，但自分境，名見枯等。謂佛用空，

名為枯涸。無常所燒，是謂流火。無我無堅，如塘煨也。二何以故下，徵釋所由。恆水決有，何緣不見。惡業障重，隨業變故。無明翳膜，喻於業障，是煩惱餘。二諸大聲聞下，合中亦二。先合不見。後何以下，合上徵釋。此中無明，是不染污所知障攝。故經揀云，不樂種智無明蔽故。揀餘染污。染污無明後已斷故。上明有障。不曾已下，明其無善。有障即前闕因三句。因不修習讚說神通，是故果中成種智障。無善即是闕現緣中無有如是勝善根故。亦即合前飢餓等也。

譬如有人，於眾會中，假寐昏寢。忽然夢見須彌山頂帝釋所住善見宮城，殊勝寶殿，園苑莊嚴。天子天女百千萬億。柔軟寶地，普散天華。種種衣樹，出妙衣服。種種華樹，開敷妙華。諸珍寶樹，出諸珍寶。諸莊嚴樹，出諸嚴具。諸音樂樹，奏天音樂。無量諸天於中遊戲。其人自見著天衣服。住止周旋，受諸快樂。其眾會中，一切人眾，雖同一處，不見不知，不能觀察。何以故。此人夢中所見境界，非彼眾會所能見故。一切菩薩及諸世主現前所見廣大莊嚴神通變化，亦復如是。以得一切佛加持故。以久積集善根力故。發一切智廣大願故。修習如來勝功德故。善住菩薩莊嚴道故。圓滿一

切種智門故。成就普賢諸行願故。趣入菩薩一切智地清淨解故。遊戲菩薩一切三昧神通海故。觀察菩薩一切境界智無礙故。是故悉見如來世尊不可思議自在遊戲神通境界，能入能知。一切聲聞諸大弟子，雖有智慧，具勝神通。皆不能見，皆不能知。何以故。以無菩薩清淨眼故。

第二覺夢相對喻。斯即大小相對。夢即菩薩。覺為二乘。喻中天宮，通喻佛及菩薩高顯廣大德，別喻如來嚴好。文云，諸莊嚴具及天衣服，皆喻嚴好，及喻菩薩集會已下十句勝德。其不見人，即喻二乘闕因之中自不

發心及不勸他發心二句，喻闕緣中無有如是見佛神通清淨智眼。合文分明。喻中分二。先明夢者自見，喻菩薩能知。後其眾會中下，明餘不見，喻二乘不知。二一切菩薩下，合中亦二。先合夢者自知。後一切聲聞下，合餘不知見。

譬如雪山，多諸藥草。猶如種植，處處出生。有大良醫，成就明智。知諸藥性差別功能。隨病所須。於中採取。其諸捕獵放牧之人，遊止其中不見不知，況能採取。此亦如是。以諸菩薩普入如來智慧境界。出生菩薩種種遊戲。能了如來三

昧境界。諸大弟子本不修習一切種智。不能利樂一切眾生。雖復住在逝多林中，不見不知如來三昧廣大神變。

第三愚對雪山喻。亦雙喻菩薩二乘知不知等。雪山良藥，通喻幽邃難見德，別喻如來遊戲菩薩三昧觀察頻申勇猛四句。其捕獵等，喻二乘闕因不能不斷佛種及不攝眾生二句，喻闕緣中無微細觀察。故下合云無有智眼。

譬如大地，眾寶所依，多諸伏藏。百千萬億珍奇雜寶處處盈滿。一一莊嚴無不備足。有一丈夫，聰慧明達，善知寶藏所

在之處。及知眾寶功能勢力。其人復有大福德力，能隨所欲自在而取。奉養父母。賑給宗親。老病窮乏，靡不均贍。諸有所求，咸令充足。其餘無福無智慧人。雖於寶處行住坐臥，以無智故不見不知。此亦如是。諸大菩薩，以有清淨普徧智眼，於逝多林，能入如來不可思議甚深境界。能見諸佛廣大神變。能了諸佛一切法門。能入無邊佛三昧海。能勤供事一切如來。能以勝法開悟眾生。能以四攝攝受群品。彼諸聲聞雖住林中，不能得見如來神力，亦復不見菩薩眾會。

第四伏藏難知喻。文亦雙喻。寶藏，通喻如來祕密

難知德，別喻如來神通。以妙用難測如伏藏故。喻菩薩供養受記成熟。以此三句是福是圓，是可重故。其薄福人，喻闕因中不修諸度，及不勸他求智眼句。文並可知。

譬如有人，以繒蔽目，至大寶洲，行住坐臥，不能得見寶樹寶衣，寶香寶果，眾寶形色，貴賤功能。復有一人，開目至彼，一切皆見。悉能了知。諸菩薩等亦復如是。至於如來大法寶洲最勝功德莊嚴之處，悉皆明見。諸大弟子雖在林中親近世尊，不見如來自在神變三昧境界，亦不得見普徧莊嚴菩

薩眾會。何以故。以諸聲聞與佛智慧不相應故，無明覆障蔽其目故，無諸菩薩無礙智故，不能次第入法界故。以是因緣，不見如來自在三昧差別神變。

第五盲不見寶喻。其寶洲等，通喻因果迴絕難測德，別喻如來尊勝，寶聚寶洲可尊貴故。喻於菩薩身業清淨智身圓滿。盲喻二乘闕宿因中不修隨順一切智善及不覺了出世善根，喻闕緣中無不思議解脫門故。故喻中說自在而取。

譬如有藥，名無垢光。若復有人用塗其眼，眼得清淨，一切

暗色不能為障。其人有時處於夜闇無量百千人眾之內，悉見彼眾形相威儀行住坐臥。此人所有威儀形相進退往來，彼諸人眾皆不能睹。此亦如是。彼諸菩薩成就如來清淨智眼，悉能明見一切世間無有障礙，其所顯示三昧神通廣大境界，大菩薩眾所共圍繞。諸大聲聞悉不能見。

第六淨眼無障喻。通喻智照難量德，別喻如來妙行。以威儀進止人不知故，喻於菩薩願身示現。不睹威儀，喻闕因中本不獲得菩薩能知廣大境界清淨眼句，喻闕現緣無有如是神通自在。舊經淨光，乃是眼名。新經

即是塗眼藥稱，義濫第八。然下第八以藥翳形，白日不見。此中淨眼，在暗能見。

譬如比丘，於眾會中入徧處定。所謂地徧處定。水徧處定。火徧處定。風徧處定。青徧處定。黃徧處定。赤徧處定。白徧處定。天徧處定。種種眾生身徧處定。一切音聲語言徧處定。一切所緣徧處定。入此定者，見其所緣地水等相光明周徧，乃至一切所緣定境。其餘大眾悉不能見。唯除有住此三昧者。此亦如是。如來所現不可思議三昧神通廣大境界，一切菩薩能入能知，一切二乘不知不見。

第七徧處定境喻。喻中，通喻周徧難思德，別喻如來威德。謂以定威德令周徧故，喻於菩薩色身普徧及相好具足。不見定境，喻闕因中不求出世究竟大善及與不求一切菩薩廣大誓願，喻闕緣中無如是廣大勢力。言徧處者，於一切處周徧觀察，無有間隙故。瑜伽智度俱舍等論，皆說有十。今有十二，前八同彼，彼中第九名空徧處，十識徧處。有此十者。先觀青等顯色普徧。次觀青等為何所依，知由地等。次思所觀由何廣大，知由於空。次思能觀，知依於識。前八皆依第四靜慮，觀欲可見色。後二依無色定。瑜伽十二云。何故徧處唯就色觸

二處建立。由此二種共自他身徧有色界常相續故。眼等根色唯屬自身，香味二塵不徧一切，聲聲有間，是故不說。無色界中空徧一切，識所行境亦徧一切，故立此二。今以宗別，合空識二為天徧處。前論所揀，皆容假想。稱性周徧，加於三事。十名種種眾生身徧處者，即前所揀眼等根色。十一語言音聲，即前聲塵。十二一切所緣，即六塵境。收前香味及法塵境。例此天徧處定，可通諸天。此亦如是下，合文可知。

譬如有人，得翳形藥，用以塗眼，身則隱蔽。於眾會中行住

往來，無能見者。而能悉睹眾會中事。應知如來亦復如是。成就智眼，超出世間，普見世間無有障礙。所現三昧神通境界，非諸聲聞之所能知。唯除趣向一切智境諸大菩薩乃能得見。

第八妙藥翳形喻。通喻隱顯超倫德，別喻如來加持，藥力所加，得自在故。喻於菩薩常光放光變化三句，皆以隱顯得自在故。其不睹者，喻闕宿因，不從如來威力加持之所生故，及不能知諸法如幻，喻闕緣中無有威德。

譬如世人，初始生時，則有二天同時而生。一日同生。二日同名。彼天與人，恆相隨逐。天常見人，人不見天。如來亦爾。住不思議一切智智廣大三昧神通境界，諸大菩薩眾會莊嚴。彼諸聲聞悉不能見。

第九二天隨人喻。通喻微妙難壞德，別喻如來剎海。對而不見，喻於菩薩普徧方網及諸行圓滿。不睹二天，喻闕因中不知如夢及與不得菩薩勇猛廣大志樂深歡喜句，喻闕緣中無有住處及無智眼所行境故。

譬如比丘，得心自在。入滅盡定。想受皆滅。六根作業皆悉

不行。亦非涅槃。世變遷流，不知不覺。何以故。由此定力所加持故。

第十滅定不行喻。上九已喻闕因緣德。今此一喻，喻住自乘。先喻。後合。喻中，先正明不行。後徵釋所以。初中，得心自在者。謂得滅定，除定障故。不入滅定，非心自在。想受皆滅者，滅心行也。此定亦名滅受想定。實則此定身語心行無不皆滅。故次句云六根作業皆悉不行。以厭想受而為先故，偏立名耳。先義云何。瑜伽論說，謂由聖者得非想定，復欲暫時住寂靜住，從

非想處上求進心，求上進時求上所緣竟無所得，無所得故滅而不轉，便證此定。意云，非想之地，猶有細想及捨受故。六根作業皆悉不行者，說都滅義。唯識論云，謂眼識等行相麤動，於所緣境起心勞慮，厭患彼故暫求止息，漸次伏除至都盡位，依此位立住滅定者。言作業者，即是依根起識等用，非如小乘說有第六，故並不。言亦非涅槃者，此言揀濫。謂雖六根作業皆悉不行，而有第八持種之心，持壽煖等諸根不壞。故非涅槃。楞伽亦說入禪正受，習氣種子皆悉不滅，妄生滅想。又依瑜伽第十二說六位無心，第六無心即是涅槃。

今是第五滅定無心，故非涅槃。舊經失旨，云定力持故，不般涅槃。今經定力自釋不知世變所以。謂前徵云，既非涅槃，世變遷流，何不知覺。釋云，滅定力持，雖非涅槃，而不知覺。若云定力持故不涅槃者，無定力持應般涅槃，便令此定為涅槃障。昔例迦葉在雞足山，定力持身，待彌勒下，故為此譯。此約羅漢合入無餘，由定力持，待於慈氏。非是通途釋滅定意。亦非此中取喻本旨。此中喻意，由滅定持令不知覺，以況聲聞由證實際不睹神通。非為釋於不涅槃難。

彼大聲聞亦復如是。雖復住在逝多林中，具足六根。而於如來自在神變廣大境界，不見不知，不解不入。亦復不見菩薩眾會三昧神通。

二彼大聲聞下，合中亦二。先合在定不知世變。此中略無。由住實際為不見因。

何以故。如來境界，微細甚深，祕密廣大，難見難知，難量難測。超過一切世出世間，不可思議，無能壞者，非諸聲聞及辟支佛所知境故。是故如來自在神力所現境界，不可思議眷屬莊嚴菩薩眾會，及逝多林普徧一切無量阿僧祇清淨世

界。如是等事，一切二乘悉不能見。何以故。以非菩薩廣大器故。

後何以故下，合上徵釋。然有二意。一正合前第十喻意。其徵意云，彼有根識，同居法會，何以不知佛菩薩境。釋云，如上喻說，定力持故，雖有六根，不知世變。今實際力持，雖有六根，不知佛境。二者此文居末，通結十喻，文分為三。一徵釋不見所以。二結不見聞。三重徵結成。今初二意。一以十句通結十喻。謂前徵云，何以廣譬明其不知。釋云，佛菩薩境甚深微細，

乃至非是二乘境故。二以十句別結十喻。唯初二句謂甚深微細結第一喻。恆河一水隨見異故。二以祕密結覺夢喻。與夢同處而不知故。三以廣大結雪山喻。處處出生諸藥草故。四以難見結伏藏喻。五以難知結寶洲喻。六以難量結淨眼喻。七以難測結徧處喻。八超過一切結妙藥翳形。九不可思議結二天隨逐。十無能壞者結滅定不行。非諸已下，總結非境。二是故下，結不見聞。因果勝境，彼皆不見。三何以下，重徵結成。以非大器，故不堪受。上來法喻，廣顯聲聞不見聞等。問。般若經明一切聲聞若智若斷，皆是菩薩無生法忍。若是其忍，何

以上言無菩薩德。答。大乘該於小乘，則智斷皆是其忍。小智不知大智，故今不見不聞。又智論說般若有二。一共般若。二不共般若。共般若，智斷皆忍。不共般若，故彼不聞。智論自指不思議經為不共故。又約法華，若已開顯，則權為實漸，故云汝等所行是菩薩道。若權實對辨，則小如聾盲，故云，假使滿世間，皆如舍利弗，盡思共度量，不能知佛智。其猶黎庶以對於王，以王收人，率土之內，皆王人也。以人對王，則貴賤等倫，天地懸隔。以性普收，一切眾生無不具有如來智慧，況於二乘無漏因果。若辨教行，權教菩薩久修六度

尚不信聞，況於二乘而能知見。二乘上首尚如聾盲，凡夫外道居然絕分。故知聾盲於勝有力。力用交徹，成大緣起。餘如前說。

△大文第六爾時東方下，偈頌讚德分。既至詠德，顯所證故。此中菩薩，即前新集。纔集即讚，正讚正集。二乘便迷，無有前後。文不累書，故編為次。若將此偈居迷失前，理亦可通，以二乘中言不聞故。而諸經本皆居後者，偈說二乘不能測故，與普賢偈為一類故。若偈於前，則謂讚後方始迷故。十方菩薩，即為十段。前二別

讚道場。後八通讚佛德。十段皆二。先舉人辨儀。後以偈讚德。

爾時東方毗盧遮那燄願藏光明菩薩摩訶薩，承佛威力，觀察十方而說偈言。

今初東方，舉人辨儀中，先標說人。後承佛下，辨說偈儀。承佛威力，表無我慢，法有本故。觀察十方，示無偏心，欲普被故。亦可承佛威力，示無偏心，徧承十方一切佛故。普觀十方，亦無我慢，不謂大會傍無人故。下皆倣此。

汝等觀佛智

微妙難思議

於此逝多林

神變無能勝。

二偈詞中，總讚一會。十頌分二。初總。餘別。別中亦二。

大覺威神力

顯現無數行

迷惑諸世間

不解佛深法。

甚深法王法

無量難思議

所現諸神通

舉世無能測。

諸佛所現相

稱揚不可盡

雖以相嚴身

所現皆無相。

佛種種神變

顯現逝多林

所現皆甚深

言辭莫能及。

前四歎如來。後五歎菩薩。前中三。初二歎內德。一廣。二深。次一歎外相，而寂用無礙。後一結成今用。

不思議億刹

具德諸菩薩

眾會廣莊嚴

奉佛故雲集。

大願悉皆滿

威儀無所著

難思心境界

舉世莫能知。

利智辟支佛

及彼大聲聞

皆悉不能知

菩薩行境界。

菩薩智甚深

最勝難超越

建立精進幢

一切無能動。

已入無量定

已得大名稱

顯現大神通

徧周於法界。

後五歎菩薩中。一總顯雲集。二行願深廣。三對劣顯深。四對他顯勝。五定用普周。

爾時南方難摧伏速疾精進王菩薩摩訶薩，承佛威力，觀察十方而說偈言。

第二南方，唯歎菩薩。十頌分二。前七，正歎菩薩。後三，結歸如來。故歎菩薩，便為讚佛。

汝觀諸佛子

妙智功德藏

能集菩提行

安樂諸世間。

三昧妙威神

智慧無邊際

彼心及境界

一切皆甚深。

今此逝多林	正徧知住處	菩薩眾雲集	普現大莊嚴，
汝觀無所著	菩薩大眾海	各坐蓮華座	安處於道場。
無去亦無來	無依無所著	究竟離分別	普現於十方，
勇猛大智幢	堅固無能動	能於無相海	現相滿塵方，
十方諸億刹	一切諸佛所	普詣不分身	悉離有無相。

前中三。初二，歎內德。前偈，二嚴利物。後偈，定智甚深。次二偈，指其外相。後三，寂用無礙。於中初一無心普周。上三句寂，下一句用。彼現不去，此現不來，不依於體，不著於相，斷分別根，為究竟離，故

能普現。次一偈無相現相。寂然不動，方能遂通。微塵十方，無不皆滿。上經云，如來非以相為體，但是無相寂滅法，身相威儀悉具足，世間隨樂皆得見。後一偈不分而徧。秋空一月，頓落百川。即體之用，故能普詣。即用之體，故不分身。非本身一為不分也。下摩耶云，非一處住。非多處住。故結句云，離有無相。有一多相，將何能令不分而徧。無一多相，復將何法普詣十方。由離有相故能不分，由離無相故能普詣，為自在也。

汝觀釋師子

種種力神通

能令大威德

菩薩皆雲集。

法界無分別 諸佛身亦然 世間唯假名 佛子咸通達。

諸佛住真實 寂滅平等際 常轉差別輪 無動無分別。

後三結歸如來中，初一偈，結歸佛力。二一偈，結知佛境。初句所等，即法性身。次句能等，通其報化。皆等真法界故。世間唯假名，拂其言跡。既理智契合，性相一如。說有三身，隨俗說耳。故舊經云，一切諸佛法，法界悉平等，言說故不同，此眾咸通達。三一偈，結歎佛德。此是佛德，菩薩所依。

爾時西方普徧出生吉祥威德王菩薩摩訶薩，承佛威力，觀察

十方而說偈言。

第三西方，此下八段，唯歎佛德。實通諸德，隨多顯名。今此歎智用應時德。十頌分二。前三法說。後七喻明。

汝觀無上士	廣大智圓滿	不擇時非時	演法恆無盡。
能摧諸外道	種種差別見	普隨眾生心	為現神通力。
正覺非有量	亦復非無量	若量若非量	牟尼悉超越。

前中初一長時演法德。根熟為時，不熟非時。今不

擇故，說常無盡。而舊經云善達時非時，與此文反。次一摧邪現通德。後一結德深廣。應持不窮其頂，目連不究其聲，等覺不知其智。稱理無邊，故非有量。丈六千尺，隨現萬殊。語其真體，量周法界。根不熟者，不令其聞。稱法而知，佛方究盡。故非無量。下半雙結，乃有二意。一者結上。非量無量，即是超越。二者拂上。假無量以遣量，亦非無量。假量以遣無量，亦非有量。故雙拂之。量與無量，皆是妄想。楞伽經云，無心之心量，我說為心量。故遣之復遣之，以至於無遣。方為寂默超越之義。

譬如淨滿月	一切皆樂見	佛德圓滿時	見者咸欣悅。
譬如空中日	周行無暫已	諸佛現神通	相續恆無盡。
譬如十方空	不礙於諸剎	智燈照世王	無礙心如是。
譬如世間地	一切同所依	諸佛於眾生	為依亦如是。
譬如迅疾風	行空無所礙	佛智亦如是	不礙於世間。
譬如大水輪	世界所依止	三世佛亦然	恆依智輪住。

後七喻中，一喻前廣大，亦根本遣惑。二喻前圓

滿，亦後得益生。三喻前現通，兼演法無盡。四喻前摧見，心如虛空，不礙異見，方能摧故。五喻前隨眾生心。六喻化而無染。七喻總依佛智。此上二偈，喻前超量。如風行空，故非有量。不壞依持，故非無量。

爾時北方無礙吉祥勝藏王菩薩摩訶薩，承佛威力，觀察十方而說偈言。

第四北方十偈九喻，歎三德深廣德。

譬如大寶山

普益諸含識

見佛亦如是

能生出世智。

譬如大海水

深廣淨無垢

見佛亦如是

能消諸渴愛。

譬如須彌山

高出於大海

智山亦如是

安住深法海。

於中二。前三標三德。一恩，二斷，三智。

譬如深大海

眾寶之所生

覺海亦如是

能生諸智寶。

世雄甚深智

無數亦無量

所現諸神通

無能測量者。

譬如巧幻師

幻作種種相

佛智亦如是

現化量難思。

後七釋成。即分為三。初三釋智德，於中一能生智，謂依根本智生後得智，依後得智能生菩薩二乘等

智。

譬如摩尼珠

所欲皆隨意

佛寶亦如是

能滿諸淨願。

譬如光淨寶

徧照於虛空

佛寶亦復然

普照於群有。

後二偈明深廣智，依體起用，難測量故。文唯一喻。

譬如八面寶

照現於諸方

無礙大智燈

徧照於法界。

譬如水清珠

能清諸濁水

見佛亦如是

諸根悉清淨。

次二成恩德，滿願照生故。後二成斷德，契理淨根故。

爾時東北方妙變化徧法界願月王菩薩摩訶薩，承佛威力，觀察十方而說偈言。

第五東北方十頌，歎普益眾生德。於中分五。

譬如帝青寶 照物皆同色 眾生見佛時 同佛菩提色。

初一偈令物智同。

一一剎塵中 諸佛現神變 念念常不斷 所化皆清淨。

二一偈普使障淨。

甚深希有智 不可得思議 菩薩乃能知 群生莫能入。

三有一偈明其益深，菩薩方了故。

佛身極清淨 具足相莊嚴 普入於法界 成就諸菩薩。

不可思議刹 皆現成正覺 降魔坐道場 菩薩眾圍繞。

釋迦無上尊 於法恆自在 一切極微刹 神通不可量。

菩薩種種行 無礙妙光明 佛力不思議 一切皆能現。

四有四偈明其益徧。一入法徧。二成道徧。三神通

徧。四示行徧。

佛子應善學

甚深諸佛法

證入諸法中

無著智境界。

法王大威力

常轉妙法輪

所現諸神通

能淨十方界。

甚深圓滿智

世間真實寶

佛智大龍王

隨心悉能濟。

五有三偈結勸修學。先一正勸。後二釋勸。一作用
普淨故，二隨心能濟故。

爾時東南方法慧光明威德王菩薩摩訶薩，承佛威力，觀察十
方而說偈言。

第六東南方十頌，歎大用難思德。於中三。初三明難思人。次四出難思法。後三明能知人。

盡十方三世

一切大聲聞

不能知如來

所有微妙法，

復盡彼三世

十方諸緣覺

亦不知如來

所有神通事。

況復處流轉

盲瞶諸凡夫

結使之所縛

而能測佛境。

今初。初二小乘。後一凡夫。二乘惑盡，尚不能知。凡夫具縛，何能思佛故。

如來無礙智

過量及非量

離於語言道

一切無能說。

佛以相嚴身

凝光如滿月

曩劫因修忍

化現於十方。

諦觀諸佛力

三昧及神通

億劫共思量

不能知少分。

諦觀諸佛智

自覺妙難思

一一功德門

無能測邊際。

二有四偈出難思法。一離言故。言絕之理，言生則喪。理圓言偏，故不可說。淨名由默，意令亡言。次一明因深故。以法望喻，乃有三意。一相具如月滿。二忍果為端嚴。三化現如光照。故此月喻，若不在初，即應居末。今當第二，但喻相嚴。次一偈明量廣故。後一偈具深廣故。謂無邊之德，一一無邊，唯是自覺聖智境

故。

若有發大願

愛樂於佛法

於斯難見境

通達不為難。

若以清淨心

精勤集福智

具足大功德

聞教能隨入。

若人依佛慧

志願亦弘深

是向佛菩提

當成一切智。

三有三偈顯能知人。一具願樂故。二集福智故。三

依佛智故。若有此三，不隔凡聖。尚當成佛，況不能知。

爾時西南方摧碎一切魔力智幢王菩薩摩訶薩，承佛威力，觀

察十方而說偈言。

第七西南方十頌，歎智身難思德。於中分四。

智身無所著

遠離於身相

難思佛境界

眾聖莫能知。

初一總顯難思。聖尚不知，況於凡小。以思心動亂，乖佛智故。

不思議淨業

起此微妙身

相好及光明

三世無能礙。

二有一偈舉因顯果。難思業成，豈是思境。

佛於一念中	顯現三世佛	所現雖無盡	念性曾無異。
佛於一念中	普現難思事	菩提深境界	無有能測知。
顯現無量色	此色無依住	所現雖無量	一切難思議。
永絕三界流	能除生死怖	成就諸菩薩	令滿菩提願。
體淨無諸垢	遠離一切障	猶如世間日	普放智光明。
徧照於世間	法界恆清淨	開佛菩提門	常生一切智。

三有六偈示難思相。一生佛智故。此偈三意。一徧。二常。三勝。勝謂開菩提門，從菩提門入涅槃性。

初地經云，以一三菩提，知一切法界即涅槃相。出現品云，如來有無量成正覺門。徧常且勝，安能思議。二普淨障故。三普滿願故。四現深廣故。隨機現色，若摩尼隨映。體非是色，如萬像依空。空不可依，故色無依住。隨現差別，廣故難思。無依之色，色即非色，又難思也。故上經云，諸佛亦如是，普現無量色，非心所行處，一切莫能睹。五六二偈念智融故。然五約橫現，六約豎現。然舊經中二偈皆智，即是佛智。故彼經云，菩提一念頃，能覺一切法，云何欲測量，如來智邊際，一念悉明達，一切三世法，故說佛智慧，無盡無能壞。梵

本大意，亦同舊經。

智者應善思

念念恆相續

唯智無別業

專向佛菩提。

是法難思議

性離於言說

亦非心境界

諸佛從此生。

四有二偈結勸修學。於中，前偈正勸，後偈釋勸。前中，初句令善，次句令常，次句示所思法唯得思智，末句一心勝進。言善思者，無思思故，上言不思。今令思者，但言難思，非無思也。故舊經云應如是思。真如相迴向云，菩薩住是不思議，於中思議不可盡，入是不可思議處，思與非思俱寂滅。故難思議。後偈釋勸者。

從難思境生於諸佛，故應做習杜絕思議。初一句標。次二句釋。末句結能生。性離於言，亡言方契。本非心境，思何能知。無思之思，智體澄湛，生諸佛矣。

爾時西北方毗盧遮那願智星宿幢菩薩摩訶薩，承佛威力，觀察十方而說偈言。

第八西北方十頌，歎佛深廣難知德。具菩薩行，方能知故。於中分二。前五別具諸行。後五具無住行。

淨念離癡亂

勇猛恆持法

圓滿智能觀

無盡菩提海。

若得決定解	則能入佛境	自在智從生	永斷諸疑惑。
念念心增進	所行無懈倦	於法常志求	究竟諸佛法。
從彼諸善根	能生廣大信	常樂常觀察	無相無依住。
億劫常修集	圓滿諸善根	皆為佛菩提	證於無比樂。

今初，即為五行。一寂照雙流行。淨者，寂無妄惑，故能離亂。念者，照能明記，故能離癡。此二常恆，方為勇猛，便持真法性淨菩提。能觀智圓，合菩提性。深不見相，廣無邊涯，湛然常恆，為無盡海。大般若云，覺法自性，離諸分別，同菩提故。二決定斷疑

行。三志樂無斷行。四積善離相行。五長時修證行。

行於生死中

不著於生死

於法無疑惑

常樂佛境界。

於諸有為法

世間虛妄樂

永離貪著心

專求佛功德。

後五成無住行。於中分二。前二正說。後三釋成。

今初。初偈不住生死涅槃行。初句有大悲故，行於生死，不住涅槃。次句有大智故，不住生死，不捨涅槃。無住涅槃，唯佛境界。既俱不住，何所疑哉。後一偈不住有為無為行。三句不住有為。第四句不住無為。又上三句不盡有為，以具智慧了世空故。第四句不住有為，

諸佛功德非有為故。

凡夫迷佛智

沒溺生死流

菩薩無著心

普救咸令出。

菩薩無動行

舉世無能測

普現隨類身

等與群生樂。

已淨菩提智

於世起慈悲

如日出世間

光照無邊際。

後三偈釋成者。一云，由生倒惑，常處生死，處而不染，方能普救。此釋初偈。次一偈云，普現無動，方棄有為而能徧修。此釋第二。後一總釋不住所以，具悲智故。

爾時下方破諸蓋障勇猛智自在王菩薩摩訶薩，承佛威力，觀察十方而說偈言。

第九下方十頌，歎佛難可見聞德。

無量億千劫 佛名難得聞 況復於現前 見佛除疑惑。

於中分二。初一標名難聞，以況於見。

如來無盡智	照世圓滿燈	三世流福河	能令眾清淨。
如來妙色身	清淨無過失	億劫常瞻仰	其心無厭足，

佛子善觀察	如來妙色身	智淨恆無著	能成自他利。
如來深智力	無盡妙辯才	開佛菩提門	所說皆無礙，
牟尼徧照尊	導彼難思眾	授勝菩提記	令登解脫門。
廣大福德聚	出興於世間	開悟諸群生	令集菩提行，
曾供養諸佛	智度恆清淨	能破諸惑網	永除惡道怖。
能觀兩足尊	發大菩提願	獲佛自在力	能生大智光，
若見人中尊	求佛心決定	當知如是人	必獲如來智。

餘九別顯益物之相。於中五。初一福智淨眾益。次二色身二利益。次二說法授記益。次二集善除疑益。後

二起願成果益。

爾時上方普徧法界大願際菩薩摩訶薩，承佛威力，觀察十方而說偈言。

第十上方十一頌，歎佛大恩深重德。

牟尼殊特尊 眾德皆圓滿 見者心清淨 回向大菩提。

於中二。初一總舉佛德。

如來興出世 寂靜大慈悲 普轉妙法輪 利益諸含識。

餘十別明恩德。於中四。初一標舉恩德。

佛於無量劫 勤苦為眾生 云何諸眾生 能報大師恩。

二有一偈出恩所由，謂因深故。

寧受三塗苦	備經無量劫	終不捨如來	而求於出離。
寧代諸眾生	永受輪迴苦	終不捨如來	而求於少樂。
寧惡道多劫	受苦聞佛名	不願生善道	暫時不聞佛。
寧地獄多劫	受苦常見佛	不願離三塗	生無佛法處。

三有四偈發荷恩心。

何故於惡道 而無厭離心 由見於法王 智慧常增長。

見佛自在力 能除一切苦 得入諸如來 甚深智境界。

若得見佛時 滅除諸惡趣 增長福智芽 必獲菩提果。

眾生若見佛 能破種種疑 世出世間樂 所願皆圓滿。

四有四偈釋荷恩意。十方菩薩，初一為總，餘九為別。同異成壞，準思可知。

△大文第七爾時普賢菩薩下，普賢開發分。淨土現相，顯

於法界。普賢主斯，故其開顯。果海離言，因門顯故。
於中長行與偈。

爾時普賢菩薩摩訶薩普觀一切菩薩眾會。欲為開發如來最上
師子頻申大三昧故。

長行中三。初明開發意。二明能開方便。三正明開
顯。今初。觀眾會者，上佛入定，現相示眾，令睹親
證。今假言顯，使尋言契實。欲為已下一行經文，正明
開意，舊經所無。

以等虛空界方便，等三世方便，等法界方便，等一切世界，等一切業，等一切眾生心，等一切眾生欲，等一切眾生根，等一切眾生成熟時，等一切法光影方便。

二以等虛空下，能開方便，有十一句。今文闕二，謂眾生解及一切劫。法界為總，以含事理具深廣故。舊經在初，今當第三者，欲與中八為一類故。初句以字，貫下諸句。其一一句，皆無分齊。謂頻申三昧業用深廣，要無分齊以為方便，始能開顯。況十表無盡，文不列數，例此應多。於中三類，虛空正明廣無齊限。次八

顯其多無分齊。光影一種，義兼深廣。映質之影，隨機別故，此顯有多。水月光影，非有非無，顯其深義。故上經云一切法如光影清淨故晉經云法光影也。

告諸菩薩言。佛子，我今為汝以十種法門清淨名句開示演說師子頻申廣大三昧神通境界。

三告諸菩薩言下，正明開顯。文分四別。謂標，徵，釋，結。今初可知。

何等為十。

二何等為十，即徵數也。

所謂等虛空界如來所現，徧法界一切佛剎極微塵中，一切諸佛出興次第，及一切剎成壞次第法門名句。等虛空界一切佛剎，盡未來際一切劫中，讚歎如來殊勝功德法門名句。等虛空界一切佛剎，如來出世顯現無量菩提門海法門名句。等虛空界一切佛剎如來所坐最勝道場，菩薩眾會圓滿境界法門名句。一切毛孔，於念念中出等三世一切諸佛變化身雲，充滿法界法門名句。以威神力，能令一身普現十方一切剎海，光明徧照諸佛世界法門名句。以威神力，能於一切諸境界中，

普現三世一切諸佛種種神變，如觀掌中，明了顯現法門名句。能令三世一切佛剎極微塵中，普現三世一切佛剎極微塵數佛，顯現種種神通境界，經於劫海相續不斷法門名句。能令一切毛孔出聲演說三世一切諸佛大願海音，盡未來際，加持出生一切菩薩法門名句。能令所處師子之座，量同法界，最勝覺解大菩薩眾莊嚴道場，徧一切處，盡未來際，轉於法輪，無間成熟，相續不絕法門名句。

三所謂下，列名。長行標名，偈方顯義。一一法句，皆用前來十種方便，一一方便皆演十句。如第一句

是諸佛出興及剎成壞即用十者，文云，等虛空界為一。徧法界為二。一切剎為三。次第為四，以次第不斷等三世故，出興必隨眾生心業欲解根器成熟如影現故，此復五句，則十句備矣。是知十句，一一皆用十種方便。十句所開，即前所現。亦念請中果用十句。文少開合，次少前卻，義無所遺。即是寄言答前念請。一即淨佛剎海。諸剎成壞，佛於中興，即是佛土。前眾同念，欲知如來淨土之相。今明一切剎塵皆有佛土，皆佛所淨，則土無邊。諸句例然。二即為一切眾生最上福田。是故文云讚歎如來殊勝功德。三即成正覺門。文甚昭著。四即

調伏眾生巧方便。安坐一剎，頓現諸剎，為方便故。五即為一切眾生現眾影像。六即入一切眾生所住處，及示諸眾生道。偈云住無等行故。七即開示一切智法城故。偈中云聽聞正法具修行故。八即為一切眾生說施功德。施為萬行之首，實具萬行，故下偈云修種種行。九即為一切眾生演說教誡，及記種種心行。意業知故。十即自在轉法輪海。然文有影略，顯法無邊。法有所本，故略會耳。

佛子，此十法句以為其首，有不可說佛剎極微塵數清淨名句

微妙法門。皆是如來智慧境界。非我及汝所能證知。

四佛子此十法下，結文可知。

爾時普賢菩薩欲重宣此如來所入師子頻申廣大三昧少分境界。承佛神力，一心瞻仰。觀察如來不可思議菩薩眾海。觀察如來不可思議三昧神通種種變現。觀察如來不可思議入出一切諸世界海。觀察如來不可思議入一切法幻智境界。觀察如來不可思議普現三世一切諸佛悉皆平等。觀察如來不可思議無量無邊諸語言道開悟一切諸法門海。而說偈言。

第二爾時普賢菩薩下，偈中分二。先說偈儀意，文有十句。初句總明說意。次承佛神力下二句，辨其說儀。後觀察如來下，廣明說意。意欲重說，故須重觀。然其所觀，即前念請果德難思。與前十句，文有影略。欲明悉開三十問故。會釋可知。

一一毛孔中剎海 等一切剎極微數

佛悉於中坐道場 菩薩眾會共圍繞

一一毛孔所有剎 佛悉於中坐道場

安處最勝蓮華座 普現神通周法界

一毛端處所有佛	一切剎土極微數
悉於菩薩眾會中	皆為宣揚普賢行
如來安坐於一剎	一切剎中無不現
十方無盡菩薩雲	普共同來集其所
功德光明菩薩海	百千億剎極微數
俱從會起讚如來	徧往十方充法界
自在遊於深法界	悉住普賢無等行
現一切剎放光明	普入無邊諸佛會
普於十方一切剎	安住最勝諸佛所

聽聞正法具修行	一一土經無量劫
菩薩常修種種行	皆入普賢願海中
住佛境界德無邊	法海光明無不徧
通達普賢廣大行	出生諸佛無盡法
讚佛功德海無涯	現眾神通充法界
身雲普現如塵數	念念恆周一切剎
甘露法雨潤群生	普徧法界令開悟

二正偈中十偈，如次頌前十句。文亦影略，顯義無方。

△大文第八，爾時世尊下，毫光示益分。令尋智光以為能證，契前所證真法界故。文中有二。先明毫光普示。後明時眾得益。

爾時世尊以最勝甚深廣大意樂正念思惟，欲令眾會諸菩薩等，安住如來師子頻申大三昧故。從眉間白毫相中，放大光明，名普照現三世法界門。以不可說佛剎極微塵數光明而為眷屬。普照十方一切剎海。

今初分五。一現光意。二從眉間下，辨光出處。以表中道大白法界方發智故。三放大光下，顯主光名。名

從用立。事窮邊際，理徹真原，故稱普照。三世，時也。法界，通事理也。而言門者，法界為門，則入三世，一味平等。故上經云智入三世悉皆平等。以三世門入於法界，則因果染淨，事相歷然，故互為門。若總為門，則入頻申三昧體用。若以門為門，非真門也。法界三昧，無二無別。能所入亡，為真入也。四以不可說下，明攝眷屬。智門無量，皆屬根本，同入法界。五普照下，明光分齊。智與理冥，無不周故。

△第二時逝多林下，時眾得益。於中四。第一明依光見法

益。第二顯證見因緣。第三明得證益。第四荷恩興供。今初分二。先明此眾普見。二類通十方。

時逝多林菩薩眾會。

前中亦二。先標見人。通新舊眾。

悉見十方盡法界虛空界一切世界所有極微，一一極微各有一切佛剎極微塵數諸佛國土，種種名字，種種色相，種種莊嚴，種種清淨，種種依住，種種形狀。如是一切諸國土中，皆有最勝菩提道場。一一道場皆有莊嚴寶師子座。一一座上

皆有菩薩成等正覺。一切菩薩所共圍繞。一切世主恭敬供養。

後悉見十方下，正明見法。於中二。先見此會徧法界剎塵中剎土。

或見處在不可說佛剎大眾會中，轉正法輪。其聲無礙，徧周法界。或見處在天王宮中，龍王宮中，夜叉王宮，乾闥婆阿脩羅迦樓羅緊那羅摩睺羅伽人非人等諸王宮中，及餘人間村營城邑，王都聚落，乃至種種眾生住處。現種種神力。說種種法門。所謂生種種族姓，受種種色身，住種種威儀，示種

種相好，佩種種圓光，放種種光網，處種種眾會，入種種三昧，起種種神變，現種種威力，發種種音聲，出種種言辭，以種種名句演種種教法。

後或見處在不可說下，辨彼剎中攝化之相。於中三。初總明演法。次或見處在天宮下，別明所徧之處。即是塵內剎中之處。後現種種下，明處中業用。所見多同念請中事，現相答故。

如此會中菩薩大眾見於如來甚深三昧廣大神變。

第二如此會中下，類通十方眾會同見。於中亦二。
先舉此顯彼。

如是盡法界虛空界東西南北四維上下，徧一切處種種方轉變中，種種方法門中，種種方想住中，種種方出生中，種種方分齊中，種種方解起中，種種方海中。

後如是盡法界下，以彼類此。於中復二。一舉能見分齊。二明所見之相。前中復二。先總相說方。後重疊微細。今初。方轉變者，隨一世界，西望為東，東望為西。亦是東方現西南等。方法門者，隨方儀式。方相住

者，東西等相，隨物而住。方出生者，一剎出多剎，多剎皆有方。方分齊者，至小至大，皆有十方。方解起者，梵本云方隨順行，意是方之道路所行之處。方海者，總顯深廣。

依於眾生心想而住。始從前際，至今現在，所有一切國土身，一切眾生身。一切毛孔中，一切極微中，及彼一切虛空界中，一一毛端量處，皆有一切剎土極微塵數，種種剎海，種種業起，相續不斷，次第而住。其中所有道場眾會，見佛神力，悉亦如是。

後依於眾生下，重疊微細辨方。於中初結前生後。謂若麤若細皆想持故。始從下三句，辨微細所依。初句豎通無始。次二句橫攝依正。次一切毛孔下，正辨微細。毛孔約正。微塵約依。及虛空界，非依非正。但取容毛，即有多剎。相續不斷，結成豎長。所有道場，橫結前處。

以得見佛神通力故，悉能徧入十方三世一切世界眾生心中，現其影像。隨諸眾生種種樂欲，出妙言音，隨其所應，演說諸法。普入眾會中，普現眾生前。色相有別，智慧無異。徧

一切剎，盡未來際，自在示現，常無休息，教化調伏一切眾生。

二以得見佛神通力故下，明所見相。然初十二字二經皆無。乃是義加。令能見下，便是見益。益在下文，此中未說。若改以得為所謂字，則還是所見。然與前所見文有影略。

其有見此神通力者，皆是毗盧遮那如來過去修集願力善根之所攝受。或昔曾以四攝善根之所攝受。或是往昔見聞憶念親近供養之所成熟。或是往昔令其發起阿耨多羅三藐三菩提

心。或昔曾於如來所，修菩薩行時，經遊之處，勇猛精勤善根所攝。或昔曾於一切佛所，與佛同種相似善根。或是如來於過去時，為求無上一切智故，種種方便，教化成熟。

第二其有見此下，明證見因緣。成前見因。生後證因。謂頓爾證見，非無宿因。皆是如來攝受力故。自曾見聞發大心故。其猶草木久含和氣，逢春則生。履霜堅冰，皆有由矣。

△第三是故皆得入於如來下，明得證益。於中二。第一略明。第二廣說。前中亦二。一明所入。二辨能入。

是故皆得入於如來不可思議甚深三昧盡法界虛空界廣大神變。

前中復二。先列名。後結數。今初。初句為總。言是故者，是前宿因之故。

或有得見入佛法身。或有得見入佛色身。或有得見入佛智身。或有得見入於如來過去所修清淨行海。或有得見入於如來究竟圓滿功德彼岸。或有得見入於菩薩莊嚴行輪。或有得見入於菩薩所證諸地。或有得見入於如來成正覺智。或有得見入佛所住諸三昧門平等神變。或有得見入於如來十種智力

四無所畏。或有得見入於如來四無礙解辯才大海。

或入下，別列十一門以顯無盡。增數十故。下廣顯相。諸句皆言或有得見，二經皆無。有則局見，不該聞等。以一例餘，義亦可通。

入如是等十不可說佛剎極微塵數如來種種大神變海。

後入如是下，結數。

彼諸菩薩，以種種信，種種解，種種道，種種門，種種入，種種教，種種隨順，種種方所，種種根器，種種國土，種種

世界，種種智慧，種種法聚，種種神變，種種方便，種種三昧。

第二彼諸菩薩以種種信下，明能入。於中二。先別明能入。後總結能所。前中舊有十門，今加其六，所謂方所，國土，世界，神變，根器，開信異解。然初三門非能入相，由見國等而能入故，亦可為門。神變一種通能所入，今取能入。信是心淨，解屬勝解，所以義開。種種解者，鑒達分明故於境印持故，種種不同，如前經說。道謂一道二道乃至無量正道助道。門謂無常門夢境

門等。入謂正證差別。教謂教門旨趣。餘並可知。以如是等，入於如來神變大海。

二以如是等下，雙結能所。如是十事等有眾多，並能入於三昧神變。別明所入即法身等。

△第二云何菩薩種種三昧下，廣顯得法。於中二。先廣能入。後廣所入。

云何菩薩種種三昧。

前中，但廣三昧一門。例餘九門，皆應廣說。或來未盡，或中上本具。文中三。初徵起。次別列。後結能所。初徵可知。

所謂入一切菩薩普徧莊嚴法界三昧。菩薩光照三世無礙境三昧。菩薩法界無斷智光明三昧。菩薩住一切佛境界三昧。菩薩光照無邊虛空際三昧。菩薩入出遊戲如來自在力三昧。菩薩勇猛無畏奮迅莊嚴三昧。菩薩入一切法界方便漩復藏三昧。菩薩徧法界如月普現，以無礙音演一切法三昧。菩薩種種法雲平等莊嚴三昧。菩薩離垢繒繫頂法王幢三昧。菩薩觀

一切佛智慧海三昧。菩薩無分別光幢照一切世間差別身三昧。菩薩入如來無分別境界身三昧。菩薩大悲藏隨一切世間轉三昧。菩薩安住一切法無依跡威力三昧。菩薩照一切法最極寂靜圓滿智三昧。菩薩知諸法空，巧能化現徧一切世間三昧。菩薩威力平等，普出生一切佛剎三昧。菩薩於一切佛剎現成正覺莊嚴相三昧。菩薩觀一切世間色空三昧。菩薩不著一切世間最勝圓滿空三昧。菩薩出生一切如來威力母三昧。菩薩修行入一切佛究竟功德海三昧。菩薩觀察一切境界出生神變盡未來際威力三昧。菩薩入一切如來次第本事海三昧。菩薩能以威力盡未來際護持一切如來種姓三昧。菩薩以決定

解力令現在十方一切佛刹皆清淨三昧。菩薩一剎那中普照一切佛差別住處三昧。菩薩深入觀察無礙際三昧。菩薩能以威力令一切世界為一佛刹三昧。菩薩出生一切佛變化身三昧。菩薩以金剛智知一切諸根海三昧。菩薩知一切如來同一胎藏身三昧。菩薩知一切法界隨所安立悉住心念際三昧。菩薩於一切法界廣大剎中現成正覺及般涅槃大威力三昧。菩薩令住最上威力處三昧。菩薩照一切佛刹眾生身無分別威力三昧。菩薩入一切佛智慧旋轉藏三昧。菩薩知一切法性相差別三昧。菩薩一剎那中以無分別智普見三世法三昧。菩薩念念中普現法界藏身三昧。菩薩以勇猛智如師子王隨順悟解一切如

來種姓三昧。菩薩觀一切法界圓滿智慧眼三昧。菩薩正勇猛趣向十力三昧。菩薩以普徧眼觀察一切圓滿功德三昧。菩薩徧照出生一切眾生色相圓滿三昧。菩薩旋轉不動藏三昧。菩薩演說一法普入一切法三昧。菩薩於一法以一切言辭差別訓釋辯才三昧。菩薩演說一切佛無二法句威力幢三昧。菩薩知三世無礙際三昧。菩薩隨順悟解一切劫無差別三昧。菩薩入微細十力方便三昧。菩薩以金剛智起一切菩薩行三昧。菩薩能於十方隨心速疾普現身雲三昧。菩薩現徧法界成正覺身種種神變三昧。菩薩受一切觸安樂幢三昧。菩薩出一切莊嚴具莊嚴虛空界三昧。菩薩念念中出等一切世間數變化形像雲三

昧。菩薩如來無垢月光照虛空三昧。菩薩一切如來加持三昧。菩薩一光照一切法根本差別莊嚴三昧。菩薩廣演一切法義燈三昧。菩薩照十力境圓滿三昧。菩薩三世諸佛星宿幢三昧。菩薩一切佛一密藏三昧。菩薩觀一切相皆究竟三昧。菩薩無盡福德藏三昧。菩薩見盡無邊佛境界三昧。菩薩見一切法如金剛師子吼威力三昧。菩薩現一切如來變化正見平等三昧。菩薩一切佛日念念周行三昧。菩薩一念普照三世法三昧。菩薩普音演說淨光等照一切法自性清淨三昧。菩薩見一切佛差別力三昧。菩薩見一切佛覺一切差別法界如蓮華開敷三昧。菩薩觀察諸法如虛空無住處三昧。菩薩一方普出十方

海旋轉藏三昧。菩薩入一切法界門三昧。菩薩一切法海差別藏身三昧。菩薩以寂靜身放差別光照一切眾生身三昧。菩薩一剎那心以大願力出生一切神通三昧。菩薩常於一切處正覺威力普徧三昧。菩薩隨順悟解以一莊嚴入一切法界三昧。菩薩正念一切佛身普照三昧。菩薩悟解最勝神通智徧一切世界三昧。菩薩一念令無量教字本母普徧法界三昧。菩薩以一教法莊嚴一切法界法光明三昧。菩薩一切佛威力光明圓滿輪三昧。菩薩以行願網攝一切眾生界三昧。菩薩見一切世界不斷絕三昧。菩薩蓮華吉祥種種神變普遊步三昧。菩薩知一切眾生身旋轉智三昧。菩薩威力普現一切眾生前三昧。菩薩悟解

一切眾生音聲言辭祕密海三昧。菩薩觀一切眾生差別智三昧。菩薩無分別大悲藏三昧。菩薩入一切如來際三昧。菩薩觀察一切如來解脫處師子頻申三昧。

二所謂下，別列百門。皆從業用受名。並以法性真如為三昧本。隨一一事皆能契實正受現前。初言普莊嚴法界者，入此三昧能令法界普妙莊飾，斯即頻申淨土一義。餘定例然。於百門中，前九十九別別業用，以多別定入佛之總，猶如百川皆入大海。最後一定亦名頻申，總相同果，以總入總，如海入海。若不冥同，何以能究

佛境大用。諸門別義，說者隨宜。恐繁不釋。皆云菩薩者，簡非果定故。

彼諸菩薩以如是等不可說佛剎極微塵數菩薩三昧而為方便。入毗盧遮那如來過去所修廣大功德，念念充滿一切法界諸佛三昧大神變海。

三彼諸菩薩以如此等下，總結能所中。如上之例，多剎塵數，方能入佛神變大海。三昧既爾，解等九門例皆深廣，文略不結。

其諸菩薩住逝多林。不離如來道場眾會。各各自見普於十方一切佛刹極微塵數廣大世界，坐於種種寶蓮華藏師子之座。皆已具足廣大智慧，普現種種神通境界。

第二其諸菩薩住逝多林下，廣前所入。於中三。第一總明。第二別顯。第三總結。今初。即廣前總句。然下別句皆滿總句。故於總句不全廣說。

已住寂靜諸菩薩地，自在出生明利智慧，已得隨順普徧智行，從佛智慧種姓而生。

第二已住寂靜下，別顯。有十一門，如次廣前別中十一句義。一智位圓極德。二色身隨應德。三智身了法德。四願行久成德。五究竟彼岸德。六二利圓滿德。七證入諸地德。八正覺智圓德。九三昧自在德。十智力無畏德。十一四辯益生德。今初至無有所依，即智位圓極德，廣前法身。此即斷於智障已淨法身。文中二。一明因位法身。二辨果位法身。今初。因位所成，即十地中成十法身。故初句云已住寂靜諸菩薩地。此為總句。乍觀此句，似廣前文所證諸地。諸地下文次第別有。次二句別。明利智慧即根本智。普徧智行即後得智。十地法

身依此成故。從佛智慧種姓而生者，顯不離果。故十地經云，菩薩十地依佛智故而有差別。

已證現前一切智智，得無癡翳清淨智眼。善巧調御一切眾生。住一切佛平等法性。於一切法隨順悟解。已能觀察一切諸法自性清淨。知諸世間究竟寂滅無有所依。

二已證現前下，果位法身。種智已圓。顯現法身，智純淨故。亦大圓鏡智。善巧調御下，果位後得。亦成所作智。住平等性，正證法身。亦平等性智。已能觀察下，即法身用。亦妙觀察智。四智已圓，法身已淨，此

即如智契合為法身也。

普詣十方一切國土而無所著。常勤觀察一切世間而無所住。普往十方一切刹土而無所去。已入一切妙法宮殿而無所來。徧於諸法了達性空，知無積聚，而恆教化成熟眾生。示諸眾生安樂行處。開示智慧解脫境界。

第二普詣十方下，色身隨應德。皆即體之用，故詣而無著，觀而無住等。教化成熟，是色身用。

恆以智身，住離貪際。超越一切生死苦海。普示眾生諸蘊實

際。智光圓滿，照徹一切。定力堅固，無能傾動。於諸眾生常起大悲。了一切法悉皆如幻。知諸世間悉皆如夢。觀一切佛現差別身悉皆如影。知所說法音聲語言悉皆如響。現見諸法生成住持悉皆如化。

第三恆以智身下，智身了法德。初句為總義兼實智。超越下，別。多比權智。定力堅固，二智所依。於諸眾生下，大悲起用。即雙行智。故如幻等，非有非無。

善能積集最勝行願。普徧智慧圓滿清淨。善巧隨順究竟寂

靜。善入總持種智境界。具足無畏諸三昧力。勇猛精進，徧修諸行。

第四善能積集下，願行久成德。故前文云入於如來過去所修清淨行海。積集即是過去所行。圓滿清淨，其文甚顯。善入總持，則總攝諸行。具無畏力，即利他行。勇猛精進，總策諸行徧修諸行，結無餘修。

住法界際獲明智眼，到一切法無所住處。修習無邊智慧行海，到智波羅蜜究竟彼岸。得般若波羅蜜之所攝持。以神通波羅蜜，度諸眾生。依禪波羅蜜，得心自在。證一切佛真實

境界。

第五住法界下，究竟彼岸德。由住法界，方到彼岸。法界無界，故稱為際。此句亦即證理彼岸。修習已下，諸行彼岸。得般若下，能導萬行到於彼岸。神通度生，即大用彼岸。禪定自在，即所依彼岸。證一切佛真實境界，究竟彼岸。

以善巧智，開示法藏。以明了智，訓釋文詞。以辯才力，說無盡法。雄猛無畏，能師子吼。常樂觀察無差別法。以淨慧眼，普觀一切。無生智月，等照世間。觀諸眾生，見真實

諦。福智堅固，如金剛山。一切譬喻，說不能及。

第六以善巧智下，二利圓滿德。故上文云莊嚴行輪。摧障圓滿，故名為輪。初利他行。常樂觀察下，明自利行。見生真實，利他行滿。福智堅固，自利行滿。

增長一切智慧根芽。勇猛精進，摧諸魔眾。無量智慧，威光圓滿。身相殊特，超諸世間。得一切法無礙智慧。解了諸法盡無盡際。智慧清淨，住普徧際。能徧隨順入真實際。無相觀智常現在前。善巧圓滿諸菩薩行。

第七增長一切智慧根下，證入諸地德。初句通明加行已具。勇猛已下，總明大用。得一切法無礙智下，顯智證如。善巧圓滿諸菩薩行，後得成行。一地之中滿一度故。此之一段，雖無地名。地義無缺。

以無二智，觀諸世間。知諸眾生往來所趣。徧諸佛刹。得圓滿智。於一切法離諸暗障。普放法光照十方界。為諸世間最勝福田。廣大願輪，如月普現。福德超勝，如須彌山。一切世間無能過者。摧伏一切外道邪論。於一切刹普現其身。以微妙音，演說諸法。普見諸佛，心無厭足。

第八以無二下，正覺智圓德。初句總。謂以菩提智覺法界故。次知諸眾生下，覺他已滿。得圓滿下，以智斷障。菩提菩提斷俱名菩提故。普放法光下，智光普周。為諸世下，堪為應供。廣大願下，勝因已圓。福德超下，明果已滿。

已得諸佛自在威力。隨所應化，現種種身。乘大智舟，泛生死海。周旋普濟，所往無礙。智慧圓滿，身光映徹。如日輪出，普照世間。隨眾生心，現眾色像。知諸眾生根性欲樂。入於無諍清淨境界。知一切法自性無生。以自在智，能令一

切小大境界互相涉入。

第九已得諸佛自在威力下，三昧自在德。文相可知。

決了佛地甚深理趣。知諸世間文字句義。以無盡句，說無盡法。於一句中演出一切脩多羅海。具足獲得廣大智慧陀羅尼身。隨所受持，盡未來劫初無忘失。一念能憶不可說劫宿住之事。

第十決了佛地甚深理趣下，智力無畏德。初之一

句，即證智力。知諸世間文字已下，即教智力。於一句中演一切法，故無所畏。總持多劫無有忘失，何所畏哉。

一念能了三世一切諸眾生心。與諸眾生一切諸佛總持法藏。常轉清淨不退法輪。令諸眾生大智慧。入佛境界。具一切智。常善安住甚深三昧。巧能分別一切法句。而於諸法悉無所著。最勝智慧自在遊戲。於諸境界皆得解脫。觀察一切淨莊嚴身。其身普入十方世界。隨所應化，悉能徧往。知諸剎海所有極微。悉於其中現成正覺。於無色性，現一切色。能

以一方，入一切方。

第十一一念能了三世一切諸眾生心下，四辯益生德。於中初知根器。與諸眾生下，正明授法。令諸眾生大智慧，是說法意。入佛境下，彰其四辯。具一切智，即法無礙智。分別法句，即詞無礙智。於法無著，即義無礙智。最勝智慧自在遊戲下，樂說無礙智。觀察一切下，說法之身。知諸剎海下，彰說法處。現成正覺下，是為究竟說法益生。略依文次，具為此配，似有條流。文義包含，難以曲盡。

其諸菩薩具足如是無量智慧功德之藏。十方所有一切諸佛悉共稱揚，說其功德，不能令盡。靡不咸在逝多林中，悉見於佛光明所照。深入如來功德大海。

第三其諸菩薩具足如是下，總結可知。

爾時彼諸菩薩得不思議正法光明照故，其心歡喜，安隱快樂。各於其身及師子座，眾寶樓閣諸莊嚴具，徧逝多林，凡所受用一切物中，化出種種大莊嚴雲，充滿十方一切法界。

第四爾時彼菩薩下，荷恩興供。於中三。初總。

所謂於念念中普放一切微妙廣大光明網雲，充滿法界，徧能開覺一切眾生咸令歡喜。於念念中出現一切摩尼鈴雲，充滿法界，出微妙音，稱揚讚歎三世諸佛一切功德。於念念中出現一切天音樂雲，充滿法界，出微妙音，演說眾生諸業果報。於念念中出現一切諸大菩薩種種行願身色相雲，充滿法界，悉以妙音，說諸菩薩所有一切廣大行願。於念念中出現一切如來自在種種神通妙變化雲，充滿法界，以隨類音，徧眾生界，演說諸佛廣大言音。於念念中出現一切種種莊嚴諸相隨好菩薩身雲，充滿法界，徧一切剎，說諸如來普於十方一切國土出興次第相續不斷。於念念中出現一切三世如來菩

提場雲，充滿法界，顯現諸佛成等正覺，普徧觀察，顯示成佛莊嚴功德。於念念中出現一切諸大龍王相似身雲，充滿法界，一一身雲徧諸佛刹，普雨一切諸上妙香。於念念中出現一切諸世間主相似身雲，充滿法界，一一世主普徧觀察，演說普賢菩薩之行。於念念中出現一切妙寶光明淨佛刹雲，充滿法界，顯示十方一切諸佛所轉法輪。

次所謂下，別。

是諸菩薩以得如是不可思議光明所照，入於廣大不可思議神通境界。法應如是出與此等不可說佛刹極微塵數種種神變大

莊嚴雲。

後是諸菩薩下，結。結其所因，由得前列十種德故。

△大文第九爾時文殊師利菩薩下，文殊述德分。文殊主智，故光後述德。放光本令證三昧用。智慧本為顯法界德。尋智得理，故讚林中。又前普賢以行顯理。此中文殊以解顯理。解行無二，方證入故。若通相說，即以文殊權實無二之智，解普賢體用無二之理。行此二無二，方顯如來頻申三昧果德體用。

爾時文殊師利菩薩摩訶薩承佛威力，欲重開示逝多林中諸神變事。觀察十方而說偈言。

文中二。先述意。後說偈詞。有十三偈，通讚一會三種世間自在之用。

汝應觀此逝多林 廣博莊嚴量無際

一切身雲皆示現 以佛威神充法界

清淨色相莊嚴身 十方無量諸佛子

咸來影現道場中 眾會普觀無不見

文分為六。初二，總歎園林通三世間。前一普徧，後一廣容。

從諸佛子毛孔中

演佛法音若雷震

燄雲種種莊嚴相

普徧十方一切剎

二有一偈，別讚眾生世間，即通前諸來及向得益諸菩薩眾興供之事。

又於寶樹華葉中

出現梵釋莊嚴相

動止威儀恆寂靜 從禪定起而遊步

佛身一一毛孔中 常現難思眾菩薩

相好端嚴甚微妙 悉與普賢菩薩等

三有二偈，讚其園林依正互在。前偈依中有正，後偈正中有正。

逝多林上諸嚴具 充徧虛空發妙音

讚說三世諸菩薩 種種莊嚴功德海

逝多林中諸寶樹 亦出無量妙音聲

演說一切諸群生

種種業報差別海

林中所有諸境界

悉現三世諸如來

十方剎海極微中

皆起神通無不徧

四有三偈，述上林空。

一切剎海極微中

所有十方諸國土

於佛一一諸毛孔

普徧莊嚴皆顯現

寶燄香雲皆現佛

等眾生數徧世間

一一咸起大神通

方便隨宜而化度

如虛空量寶宮城 盡妙莊嚴如日現
寶藏及與菩提樹 靡不普徧於十方

五有三偈，述於正覺依正無盡。

十方三世諸如來 所有道場菩薩眾
劫海修行功德相 一切於此林中現
普賢大行諸菩薩 已於剎海具莊嚴
其數無量等群生 於此林中無不見

六有二偈，總顯普收。

△大文第十爾時彼諸菩薩下，大用無涯分。開必成益，益必利生。

爾時彼諸菩薩蒙佛三昧光明照故，一一皆得不可說佛剎極微塵數大悲門。

於中二。先總顯用因。謂由佛三昧成悲門故。

△後以得如是下，依體起用。於中亦二。先唯明毛孔菩薩世主用。後通顯分身多類用。

以得如是大悲門故，攝受利益安樂眾生。即於其身一一毛孔各出不可說佛剎極微塵數眾色光明。一一光明各各化現不可說佛剎極微塵數菩薩身雲。復出一切世主相似身雲。充滿十方一切法界。普現一切諸眾生前。隨諸眾生身相言音，種種方便，教化調伏，令其成熟。

前中三。初總明。次別顯。後總結。今初有五。一化所依。謂大悲門。二出化處。謂一一毛孔。三明化身。謂毛現多光，光有多身。四明化境。為一切眾生。五明化儀。隨類調伏。

或現不可說佛剎極微塵數諸天宮殿退墮無常門。或現不可說佛剎極微塵數一切眾生隨業受生門。或現不可說佛剎極微塵數夢中境界令心覺悟門。或現不可說佛剎極微塵數一切菩薩圓滿諸行門。或現不可說佛剎極微塵數一切菩薩圓滿大願門。或現不可說佛剎極微塵數震動世界門。

第二或現不可說下，別顯有四。一化法。二化處。三化心。四化益。今初。有二十二門分二。前六雜明欣厭等門化。舊經有八。第六門後，加分別世界門，現生世界門。梵本所無，故經不出。

或現不可說佛剎極微塵數一切如來悉捨內外檀波羅蜜門。或現不可說佛剎極微塵數一切如來修諸功德正行圓滿尸波羅蜜門。或現不可說佛剎極微塵數一切菩薩斷截支體心無動亂屢提波羅蜜門。或現不可說佛剎極微塵數一切菩薩勤修種種智慧神通毗梨耶波羅蜜門。或現不可說佛剎極微塵數修諸靜慮等持等至神通解脫禪波羅蜜門。或現不可說佛剎極微塵數智光照世般若波羅蜜門。或現不可說佛剎極微塵數，勤求佛法，為一一名句一一文義，皆捨國城妻子財物無數身命門。或現不可說佛剎極微塵數，於諸如來親近供養，諮求請問一切法要，心無疲厭門。或現不可說佛剎極微塵數，隨諸眾生

根欲成熟，往詣其所，開發示導，令其悟入智海光明門。或現不可說佛剎極微塵數，一切菩薩大福智聚，摧伏眾魔，制諸外道勝幢威力門。或現不可說佛剎極微塵數知一切工巧技術明智門。或現不可說佛剎極微塵數知一切眾生心行微細差別明智門。或現不可說佛剎極微塵數知一切諸法種類差別殊勝明智門。或現不可說佛剎極微塵數知一切眾生種種心樂差別明智門。或現不可說佛剎極微塵數知一切眾生根行差別煩惱習氣令其除滅明智門。或現不可說佛剎極微塵數知一切眾生品類差別業報明智門。

後十六門唯明十度化。方便有二。智度有六。餘各一門。禪中云等持者，謂離諸沈掉平等持心趣一境故。此通方便散心，而局在有心。言等至者，平等持心至一境故。此唯諸位所有定體，而通有心及無心定。神通解脫即二類定所引功德。此之三類皆禪度攝。亦可般若已後雜明諸門，不配十度，於理無失。

以如是等不可說佛剎極微塵數諸方便門，往詣一切眾生住處，攝受調伏而成熟之。所謂或往梵王宮。或往帝釋宮。或時往詣天，龍，夜叉，乾闥婆，阿脩羅，迦樓羅，緊那羅，

摩睺羅伽，人非人等，閻摩羅界，諸王宮中。或往畜生餓鬼地獄之所住處。

二以如是等下，明化處。

以平等大悲，平等大願，平等智慧，平等三昧，教化攝取而調伏之。

三以平等大悲下，明化心。

彼諸眾生，或有見已而調伏者。或有聞已而調伏者。或有憶念而調伏者。或聞音聲而調伏者。或聞名號而調伏者。或見

圓光而調伏者。或見光網而調伏者。

四彼諸眾生或有見已下，明化益。並可知。

隨諸眾生心之所樂，皆詣其所，令其獲益。

第三隨諸眾生下，總結。

而此林中一切菩薩為欲成熟諸眾生故，雖以神力或時現處種種嚴飾諸宮殿中。或時示現住自樓閣寶師子座，道場眾會所共圍繞，充滿十方一切剎海，普徧示現皆令得見。然亦不離此逝多林如來之所。

第二而此林中一切菩薩下，通顯分身多類化。於中三。初結前生後。次別明多類。後總結自在。今初。謂前化後化，皆不離本會而普徧故。故昔人云，雖遊形於法界，而未動足於祇園。斯乃即寂而動，即去而留。事理本末，非即離故。

又此菩薩為欲成熟諸眾生故，示現無量變化身雲。或現其身眷屬莊嚴，或現其身獨一無侶。

第二又此菩薩為欲下，正明多類現身化。於中二。一能化身異。於中初三句總。

所謂或現沙門身。或現婆羅門身。或現異道出家身。或現苦行身。或現充盛身。或現醫王身。或現商主身。或現婬女身。或現伎樂身。或現毗沙門身。或現世主身。或現奉事諸天身。或現工巧技術身。

所謂下，別。有十三身。此中多同善財所見。明善財見即此菩薩，不離本會而周徧故。明知本末因果交徹。言沙門者，如德雲等。婆羅門者，最寂靜等。異道出家，即徧行等。苦行即勝熱等。充盛即不動等。醫王即彌伽等。商主即無上勝等。婬女即婆須密等，伎樂毗

沙門，此二主友，似無伴友。則有如明智居士中作諸伎樂，頻申尼處見毗沙門來聽法等。世主即大光王夜神地神等。奉事諸天，即大天等。工巧技術，即自在主等。

現如是等諸變化身往詣一切諸眾生所，隨其所應起如幻智，於諸世間猶如帝網，行菩薩行以種種形相種種威儀種種音聲種種言論種種住處演說諸法。所謂或說一切世間工巧事業，或說一切福德智慧照世明燈，或說一切所證真實威力加持，或說一切業力所持莊嚴世趣，或說一切建立十方清淨乘位，或說一切圓滿智燈照法境界。

二現如是等諸變化身下，明化法異。

如是菩薩雖普周徧十方世界，教化調伏成熟眾生，而亦不離此逝多林如來之所。

第三如是菩薩雖普周徧下，總結自在。文並可知。
上來十門明本會竟。

淨空法師專集網站(簡)製作